

# MULENA YA HANILWE



. . .kwa kanya ya Mulena ye ka tiswa ku luna kacenu ka kukutazwa kwa Linzwi. Mi ki . . .

2 Biki yefelile ye, Ni bile fela yaba mwa makulano nyana. Isi kubulela kuli ne ni kula; neli tatubo yene Ni lukela kunga, litatubo ya mubili. Mi zeo kona ze ne mu utwile, kuli Ne nili mwa sipatela. Neli bakeñisa kuli Ne niile kwateni kacwalo Ne ni sa lukeli kutaha ni kukuta inge ni sila nuka. Muna ni mba ya fahalimu, ni mba ya mwatasi. Mi lina ni ku, kasamulaho wa mizuzu nyana, bana ni kukuta ku to monyeha ka x-ray hape. Kono luswanela kubanga ni zona, haiba lueza misebezi ya kwabuse bwa mawate, kasamulaho wa likweli zesilezi kaufela. Muzwale Roberts ni babañwi, Na sepa, ba amuhelanga za bona kasamulaho wa likweli zesilezi kaufela. Kono Na ne ni si ka eza cwalo fa myaha yemine.

3 Butata bwateni, ha Ni tabelangi fela ona mafula a castor ani, kona taba yateni fela. Mi ba bulela kuli hakuna se bakona kufa, sa kuyolisa, mi Na, oh, Na kulanga hahulu ha ba ni fanga mulyani wani. Mwa ziba, Ni mi bulelezi, mwa likande la bupilo bwa ka, mulyani wani mo u ni kulisezanga. Mi—mi Ni toile fela ku u nwanga. Mi se Ni bulelela dokota waka mulikani yomunde, haiba . . . “Kikuli hakuna usili?”

Mi ki hali, “Ha ni sepi cwalo, Muzwale Branham.”

4 Oh, kalibe yani hana kena mwahali ni, na bonahala inge, mwendi Na ekeza, kono, no bonahala inge painti yetezi. Neli—neli . . . Ne ni si ka bona zeñata cwalo. Mi se Ni tiba fela ngo yaka ni pumata ni sa buyeli. Kono kwa mafelelezo Na be na miza.

5 Kono cwale, mwa miliko kaufela, ni kaufela zona za fita, Ni bata kulumba Mulena kwa tatubo yepetehile. Ni pasize, handende ka kutala, nakona kuya kai kaufela mwa lifasi ko Ni bata kuya. Na buza madokota, bene bali babalalu licaziba zefeza, kuli, Na—Na sepa, neli mwa Louisville. Mi se Ni ba buza, Na li, “Kana Ni fitelezi teni pesenti mwa buhole?”

6 Bali, “Mane ha u sihole nihanyinyani.” Bali—bali, “U iketile fela hande, ka mukwa kaufela.” Mi Ni itumezi hahulu ku Mulimu. Ki ku mañi ko ne li ka zwelela haisi ku Ndate wa Lihalimu, mwabona, kuba ka nzila yeo?

7 Mi ki hali, “Wena . . .Kububa kwa mali a hao kaufela, mwahali mwani, usali mwanana.” Ki hali, “Maselu a hao a mali hasika ikaba kale, kamba sika kaufela.” Ki hali, “U iketile hande hahulu, Muzwale Branham.”

Mi se Nili, “Kihande, Ni tabile hahulu.”

8 Mi Ne nina ni lithohonolo la kubulela, kupakela nasi kaufela mwa sipatela sani, ni dokota kaufela, kwa Mubuso wa Mulimu. Mi dokota yomumu, Ni sepa ulukela kubateni mo kakusasana cwana. Mi Ni—Ni ka . . . Ni tabile ka kuziba kuli ku sa na ni baana baande mwa lifasi lee, baana sakata, baana baba kona ku ninga ka mazazi a ketalizoho, mwahala litatubo za mubili, zekona kutanda madollar akuma fa tuu kamba sili handeleti ku mutu ni mutu. Ha Ni yo feza, se bali, “Ki tuso ya luna kwa musebezi wa Mulena, o sweli kueza.” Mwabona? Eehe. Mane kusina . . . Nali, “Kiñi ha u lu swabisa, mane nihaiba ku lu buza haiba u lu kolotezi.” Bali, “Litapelo za hao fela ku luna!”

9 “Mi mwahali,” se bali, “lu fumana buino bobuñwi bo lu sa utwisisi.” Mi se Nili . . . “Luka . . . Ha—ha si bonahali kuba . . .” Ki hali, “Kwande, ha u si ka ikalelwa kamba ku lyangana. Kono,” ali, “mwahali, kuna ni maikuto o lu sa utwisisi.”

10 Se nili, “Haiba u ka ina fela fafasi fa nako nyana fela, Ni ka ku bulelela.” Mi Na yo ambola ka za lipono. Neli simu yeñwi ku bona. Hakuna se ne baziba ka zona. Na ba bulelela ka za Bibehe. Mi Na ba bulelela ka za pono yana ni file Mulena zazi leliñwi, mi ba lila inge limbututu. Baina fela fani inge ba lila. Mi Na . . . ba . . . Se nili, “Ni sepa kuli ha mu ni talimi kuba sikuba sa bulapeli kamba nto yeñwi.”

11 Bali, “Batili ha ki cwalo, Muzwale Branham. Ni lumela cwalo ka pilu yaka kaufela.” Ki hali, “Kono nto iliñwi fela ye Ni bata kubulela. Ha u koni kuya kwa sikolo ku yo ituta lika zeo.” Ali, “Ni lumela kuli li zwelela ku Mulimu Yamata kaufela.” Mi bani neli baalafi babalalu babatuna ba mwa Louisville, licaziba sakata ze ne banani. Mi, kacwalo, Ne ni li ya tabile hahulu ka sani, ni ka kuziba kuli mwendi Mulena u ni lumelelize kucala peu yeñwi mwateni.

12 Nasi ufi ni ufi, na ambola kubona. Bona, kakusasana omuñwi, ha ni zwa mwa muzuzu wa x-ray, Na ambola ni . . . Na talima musali muhulu yani. Neli wa kukula kula. Mi Na zwelapili fela kushetumuka, kushetumuka konji Ni fita ku yena. Ne ni hupula kuli mwendi wa shwa. Mi Na li, “Ni bata ku ku buza puzo, kezeli.”

Musali ali, “Eeni, sha.”

Se nili, “Kana u Mukreste?”

Mi ki hali, “Ni wa kekeke ya *kuli*.”

13 Mi se Nili, “Ni bata fela kutatulula foo hande.” Se nili, “Ni—Ni bata kuziba haiba u Mukreste, Mukreste wa luli. Kuli, haiba u silela mwabuse bwa liwate la bupilo lee, kukena mwa Naha yeñwi, kikuli wa Mu lata naa?” Se nili, “Kikuli luli no ka piliswa?”

Mi musali ali, “Eeni, sha. Ne ni ka piliswa.”

14 Mi se Nili, “Mulimu a fuyole pilu ya hao kanti. Hakuna taba kamba moya ufukela kai, u lukile kanti, haibile fela uka fuka ona cwalo.”

15 Mi haiba lu ka zamaya kwa ni kwa, kuna ni batu babañata niteñi mwa lifasi.

16 Cwale, kacenu, Ni tile ni pono ye Ni ka mi bulelela kasamulaho nyana. Mi Niabela kubulela, pili, ku zeñwi za Linzwi, kakuli Ni lumela Linzwi kuba la butokwa hahulu, nto yabutokwa hahulu cwale. Mi Ni tabile Charlie Cox, ni, muzwale, mulikana ka ya yemi fani, hamoho. Muzwale, Ha ni sa hupula . . . Jeffries, Ha ni sa hupula libizo la hae. Buñata bwa mina mizwale babañwi babande babazwa kwa Georgia, kuzwa kwa libaka zeshutana za naha. Mulikana ka wa kale, Bill, yainzi faa, Na lumela ki yena, kakusasana cwana. Ni—ni babañata . . . Ni muzwale yazwa kwa Georgia fani, kona sicaba se si ni file suti yee. Mwa ziba, yeo—yeo ki iliñwi ya masuti amande e Ni kile natina fateni. I utwahala fela hande, ki yende luli hakalo. Mi mutalusa lika zetuna ku na. Ha Ni mi bulelela ze ezahalile, mazazi nyana a fitile, ku na, mu ka bona libaka ha Ni nahanela kuli ki nto yende luli ku na.

17 Cwale, Na lumela, haiba Mulena wa lata, Ni bata kulwana ndwa katata kufita sapili kwa mulaho, mwa bupilo bwa ka. Kakuli, Ni fumana cwale kuli ki . . . Kakuli, Na kona kushwa kacenu. Foo kikuli, ha mu zibi. Electro-cardiogram yaka ni lika kaufela, ma x-ray ashutana a sikisitini, eehe, ki mubili o kwanile luli, na bonisize kuli Ne nili mwa . . . buiketo hande sina mutu kaufela mwakona kubela, mutu mwa lifasi. Kacwalo Na itumela ka seo. Kono, lika kaufela, nihaiba zeo kaufela, mi ka kuitumela ni milumbeko ku Mulimu, luli Na itumela, zeo Na lumela kuli U sa ni bulukela mwa sebelezo ya Hae, ne si sa Na ni bonisize kale sani si si ka ezahala kale, mwabona, sa ni tabisa fela hahulu.

18 Cwale, Na sepa, busihu boo . . . Ku lukile ki wena? [Muzwale Neville uli, “Eeni, sha.”—Mu.] Mu—mu muzwale waluna yomunde ki—ki muuna alimuñwi yasina buitati, ki—ki Muzwale Neville. Mi haiba kuna ni yomukana wa mina yana liteni mo la Sunda mi yana utwile liñusa lelinde la na tisize lani, kaza “silibelo sa oli,” ne li zwile . . . Leliñwi la mañusa aipitezi luli le Ni kile na utwa fateni, ki la na kutalize Muzwale Neville, ka Moya o Kenile, Sunda yefelile, kwa sikwata nyana sa mutapi seo Mulimu akopanyize hamoho.

19 Mi haiba ku kaba hande, zetabisa ku Mulena, ni ku Muzwale Neville ni keleke, Ni bata kubulela hape busihu ni kukalisa mukoloko wa, ni bulele kuli, la Mubulo busihu . . . Ni talusa kuli, la Sunda busihu, ni la Bulalu busihu, ni la Sunda yetaha, mukoloko wa lituto o Ni balile.

20 Ne ni sa lukeli kuina nako yetelele kwa sipatela. Kono nebali babande hahulu kuna, ne ba nifile muzuzu olikana kalulo iliñwi

ku zetalu mwa tifo. Mi kacwalo Na pamula fela Libibele zaka, libuka zaka, ni kuzuha fa mumbeta, ni kuina fani inge ni hatile ka masito, mi nanga Libibele za ka kaufela ni lika zeñwi ze ne liteni. Mi luli Ne nina ni nako yetata, konji ha ba yo ni tiseza mafula a castor ani. Nako yaka yende yafelela ona fani. Ne—Ne ni se ni felile ka nako yani. Kono, Muzwale Pat, Ne ni kulile luli. Mulyani wani, Ha ni koni fela kuitiisa. Mi, kono, Nenina ni nako yende, kwani ka mazazi apili amalalu kamba amane. Ne ni na ni nako yende.

<sup>21</sup> Mi Ne ni sweli kubala Buka ya Maefese. Oh, kutomanywa kwa hamoho kwa Keleke. Mi Ni sepa kuli ki nto yende. Mi—mi haiba muka . . .

<sup>22</sup> Cwale, haiba muna ni keleke kwa kuya, muzwelepili cwalo mi muyeme fa sibaka sa musebezi wa mina. Kono haiba hamuna keleke, mi mutabela kukuta busihu kacenu, ni la Bulalu busihu, ni la Sunda busihu.

<sup>23</sup> Ni tabela kunga, busihu boo, Buka ya 1 ya Maefese; mi busihu la Bulalu, kauhanyo ya 2 ya Maefese; mi Sunda yetaha, kauhanyo ya 3 ya Maefese; ya kutoma Keleke mwa sikuka. Mwa ziba se Ni talusa, ki ku I tomahanya, hande. Mi Ni nahana kuli ki kuyahiwa, kwa Keleke. Ha ni . . . Ni—Ni bulela fela ku baba tahanga kwa Branham Tabernacle.

<sup>24</sup> Mi haiba ufi wa mina kaufela mizwale babande . . . Na ziba babañwi ba mina, Na sepa, muna ni mikopano. Muzwale wa luna yomunyinyani ukwa Sellersburg, mi—mi ni ba bashutana, bana ni mikopano. Cwale, mutalime, yani ki mikopano ya ancafazo. Mube kwateni koo. Ki batanga ba Kreste, mizwale ba sanana ba bayemi mwa pakani, ba bazwile. Mane nihaiba keleke yabona luli ihanile Niti, ni lika zecwalo, ba zwa ku yona. Mi Mulimu aba bizeza kwa bulumiwa. Eeni, sha. Na—Na ikumbuta muuna . . . Hanisa kona kuhupula libizo la hae. Kono ki mutangana fela wa sanana, yomunde mucaha ya bonahala hande, ni musali ya lateha ni bana.

<sup>25</sup> Ni—ni Muzwale Junie Jackson ubile ni mikopano kwanu, ili nto yeñwi yende, ki mupuzo omunde hakalo wa sishemo se si komoka sa Mulimu. Mi habana ni li ancafazo mwa likeleke za mina, muzwele teñi ku bona, kakuli zeo ki za mina . . . za kueza. Kakuli, ha muzibi, kwakona kuba muezalibi ya taha kwa katala, mi mwakona ku susumezwa kuisa mutu ku Kreste, ili nto yekaba mupuzo omutuna kwa buse bobuñwi.

<sup>26</sup> Ye ki tuto ni kutomahanywa kwa Keleke mwa sikuka, kwanu kwa tabernakele, lutusa halunze luya cwalo.

<sup>27</sup> Cwale, Ha ni si ka taha ni waci yaka, kacwalo kuna ni ya lukela ku ni tokomela. Doc u ni bonisize, una ni iliñwi. Kacwalo, muzwale waka . . . Kacwalo cwale . . . [Muzwale Edgar “Doc” Branham uli, “Hanina ku ku lifisa hahulu ka yona,” mi ufa waci ya hae ku Muzwale Branham—Mu.] Hauna ku

ni lifisa hahulu ka yona? Ku lukile. Kihande, cwale, zeo ki zende. Kihande, cwale, Ha ni lumeli kuli taba yateni ilukile, ka kukala. Kacwalo . . . [“Ni itumezi. Ni ka bulela nto iliñwi ka wena.”] Cwale, oh, oh, sh-sh-sh-sh. [“Ni bulukile teni peni faa, ka lizazi la kupuzo ya kupepwa kwaka, kakusasana cwana, kuli uikutwe fela hande.”] Mina boo? Cwale zeo ki . . . Waci ye i zamaya fela hande kufita sapili, Doc. Abulela unani ma pene amalalu abulukile, ka kupuzo kupepwa kwahae, kuli ani utwise hande, kakuli kuna ni zepeli ni zetaalu mwahala yena ni Na. Kacwalo mwakona kubona fo Ni yemi, mwahala musipili. Kono, oh, seo hasina taba ni yekana, ku na. Cwale, Hanina kubulela nako yetelele hahulu.

<sup>28</sup> Cwale, haiba kuna ni baeñi mwahala luna, luli lubata ku mi amuhela ka lipilu za luna kaufela. Mu amuhezwi hahulu kwa tabernakele ye. Haluna muyaho omutuna hahulu. Li mwa tukiso cwale ya kuyaha, ha ki sibaka sesituna, kono fela ki . . . Wo ki muyaho omunde o sinyehile. Mi lu ka lika kuyaha keleke yende hakalo kwanu, lu sa kona fela halunze lu . . . Mulena ha ka lu lumeleza kueza cwalo. Mi buñata bwa mina kaufela musweli kuama taba ye, mi luli lwa itumela ka zona.

<sup>29</sup> Cwale Ni bata kuli muapule ni na, kakusasana cwana, mwa palo, mwa Samuele Wapili kauhanyo ya 8, mi lukale ka, ha lu kaleni ka timana ya 19, litimana 19 ya 20, mwendi, kwa palo nyana ya tuto.

<sup>30</sup> Mi cwale, hamunze mu apula ku yona, mi lusika ba kale . . . Lu ka i bala, mi kipeto lu ka kena mwa tapelo. Mi kana kuna ni kupo yeñwi kakusasana cwana, mi muli, “U ni hupule fela”? Mwa mukopano wa luna ofelile, lisunda zepeli kwa mulaho, kamba zetaalu, hane Ni na ni mukopano . . . Lubulele kuli, luka . . .

<sup>31</sup> Ka manzwi asili, ha musweli kuapula cwalo, mukopano ukalisa mwa Chautauqua, ka la 6 cwale. Lu kulubela nako yende, Middletown, Ohio. Mina muna ni libaka za mina za malobalo kwani, mutahe. Mi mukopano omutuna, uteni kwa nuka, kwani, oh, luka . . . likutazo kaufela zemukile mwautwa fateni. Kaufela bateni kwani fahalimu ni fafasi, bakutazi, kakusasa ni kakusasa, mwahala musihali kaufela ni busihu. Kacwalo kaufela bona ba kopana hamoho. Ki sibaka sesituna sa mafulo, sesituna kufita sa Silver Hills, linako zeñata. Mi—mi ni sibaka sesituna kwateni ko lukona kuinisa sicaba ma sauzande a eiti kamba a lishumi. Mi kamita kutezi ni fande. Luna ni nako yende mwa Ohio.

<sup>32</sup> Mi muunamuhulu Muzwale Kidd, yene Ni ilo lapelela, kakusasana omuñwi. Mina kaufela mwahupula ha ni mi bulelela, lisunda zetalu kwa mulaho? Dokota na mufile liholo ze twenti-foo za kupila. U zuhile mi wa zamaya kwa ni kwa. A bala Liñolo, pina yana sa koni kuopela. Mi ha Ni yo kena ni ku mu talimela,

kakusasana omuñwi, ni shawelo nyana yani ali kuikapesa yona. Na zwa kwanu mwendi ka sili kamba fo ya kakusasa lisika pazula kale, kuli Ni yo fita ku yena. Ne babulezi kuli u ka shwa zazi lani; kansa mwa sinyo.

<sup>33</sup> Mi musala hae, yomunde, yomunyinyani wa mucembele, na tapisezanga mali alikana ma senti a mashumi ka zazi; foo ki ka mapakela li si ka pazula kale, konji kuisa mwahala busihu, kutapiseza fela ma senti a mashumi, kuli a buluke muuna hae mwa simu ya bukutazi. Akutaza lisunda zepeli za ancafazo, mi a amuhela neo, ya masenti a mashumi aketalizoho ka amalalu.

<sup>34</sup> Kono Na ba bona inge bainzi kwani kakusasana omuñwi, banana bani, mwa manyalo a bona a busupali, bo mutu ni musala hae, ni taluse, inge bainzi fani, ni shawelo ya hae nyana fa liheta. Mi alimuñwi wa ba tizize kwa kubaka, myaha ye nainte-tuu ya kupepwa, ba batalifile fela ni kutona hande, mi ili Mapentekota sakata, mi nebainzi fani, mwa ziba. Mi se Nili, “Mwa ziba ze muinezi fande fa mina macembele? Neba libelela fela mukolo kuli utahē.” Ku felile. Musebezi wa bona, kaufela ze ba ipumanezi, ni—ni mulelo o ba ipumanezi, mi ba itukisize cwale ku ya kwa mupuzo wa bona.

<sup>35</sup> Mi se Nili ku Muzwale Clev, kuli Muzwale Kidson. . . Kidd, kakusasana wani, “Ukaba kwa mukopano wa mwa Chautauqa.”

<sup>36</sup> Na ni lizelize maabani, ali, “Ni. . .Ni kabateni, Muzwale Branham.” Kihande fela.

<sup>37</sup> Buñata bwa mukopano, kuzwa mwa bulumiwa bwaka bo bunca bo butile. Muzwale, muzwale wa Baptist ya yemi fa, mwana hae wa musizana, yamwa myaha ya bunca, neli ya sa utwi wa litanya. Mi a mu bulelela kuli, “Ni kufa mwana hao wa musizana ku Mulena Jesu,” kakusasana omuñwi. Mi ha yo ya kwandu, u pilisizwe. Mi yomuñwi fa ki yoo kakusasana cwana, kuli a kolobezwe ni yena.

<sup>38</sup> Mi muuna, Bo Sothmann, mulikana ka yazwa kwa Canada, makwenyana hae ba basali mwa buino bwa kushwa, ali, “Uka fumana makwenyana hao ha u ka yo fita, kihande, mwa musipili wa hae wa kufola, ku lukile.” Ona cwalo kona mo ne kuinezi. Mi fela. . .sicaba ne si taha. Li mwa makalelo a zona cwale, za zamaya. Kono, oh, lu kulubela zetuna ni kufita, fahalimwa lika kaufela. Lu mwa mazazi a manswe mi a sabisa, kono ki hola ye kanya.

<sup>39</sup> Cwale muna ni Bibeles ya mina nji, kwa palo, kauhanyo ya 8 Samuele? Mi Ni sepisize Gene kuli ainele kwa mulaho kwani, kuli arekode zeñwi zatani. Ne lusweli fela kukalisa, mwa mukopano wa luna.

*Nihakulicwalo sicaba sa hana ku utwa linzwi la Samuele; sa li, Batili; kono lu kaba ni mulena ya ka lu busa;*

*Kuli lu...swane sina...macaba kaufela, macaba kaufela; ni kuli mulena luna a lu atulelange, mi alu zamaye kwapili, ni kuli azamaise lindwa za luna.*

*... Samuele autwa manzwi ao kaufela a sicaba, mi... a abulela mwa lizebe za MULENA.*

*Mi MULENA ali ku Samuele, U utwe linzwi la bona, u bafe mulena. Mi Samuele ali kwa baana ba Isilaele, amukutele mutu ni mutu akutele mwa munzi wa habo.*

<sup>40</sup> Cwale haiba Ni ka lika kuketa ku yeo, kakusasana cwana, se Ni ka biza kuli kona taba, ka mizuzu helikani yetatama, Ni tabela kuketa taba ya kuli: *Mulena Ya Hanilwe*.

<sup>41</sup> Ne li nako, kuli sina mwa linako kaufela, kuli sicaba ha si bati Mulimu kuli aba zamaise. Si tabela nzila ya sona fela ya bueteleli. Mi likande le kakusasana cwana... Mi ha mu ka ya kwa malapa a mina, ikaba hande kuli mu yo ibala kuisa kwa mafelelezo. Neli ka nako ya—ya mazazi a Samuele, muuna wa Mulimu, mupolofita. Mi nali muuna ya lukile, mi ili muuna yomunde, ya kutekeha, wa maoyo, ya sephala ni batu, na sa ba pumi, mi hakuna sa na ba bulelelanga kwanda ze namile hande zakuli KISONA SA BULELA MULENA.

<sup>42</sup> Kono sicaba sa taha fa sibaka fo ne si bata ku cinca tukiso ya lika. Ne ba ikumbuta Mafilisita, ni Maamaleke, Maamori, Mahiti, ni linaha zeñwi za lifasi. Mi ne ba boni kuli nebana ni malena bene ba ba busa, ni ku ba zamaisa, ni ku ba zamaisa, ni ku ba lwanela lindwa za bona, ni zeñwi cwalo. Mi nto ye neibonahala kuli Isilaele neibata ku likanyisa kwateni inge malena babañwi bani, mi inge sicaba sani.

<sup>43</sup> Kono kwali ku ba, mwa lusika lufi kaufela, mulelo wa Mulimu kwa sicaba sa Hae ha ki wa kueza sina sicaba sa lifasi, kamba ku busiwa kamba ku zamaiswa inge batu ba lifasi. Sicaba sa Mulimu, sina kamita, ibile ba—ba batu babaipitezi, sicaba se si shutana, se si bizizwe, se si kauhani, mi sa shutana mwa likezo za sona, mwa linzila za sona, mwa mukwa wa kupila kwa sona, kufita mo bainezi batu ba lifasi. Litakazo za sona sa lika, ni sibupeho sa sona mo siinezi, bao nako kaufela ba shutana kwa lika zeo sicaba sa lifasi si lakaza.

<sup>44</sup> Mi sicaba sa Isilaele sa taha ku Samuele mi sa li, “Cwale, u ya u supala, mi bana ba hao babashimani ha ba sa zamaya ka nzila ya hao.” Kakuli, ne ba sa sephali sina Samuele. Neli makulukuku ni ba ba lata mali. Mi se bali, “Samuele, bashimani ba hao ha ba swani ni wena, kacwalo lubata kuli uzwele kwande u lu fumanele mulena, mi u mu toze, ya ka lu eza kuba sicaba inge macaba amañwi kaufela a lifasi.”

<sup>45</sup> Mi Samuele alka ku ba bulelela kuli hakuna ku konahala. Ki hali, “Haiba mueza cwalo, taba yapili mwa ziba, mu ka fumana kuli uka biza bana ba mina kaufela ba bashimani mwa malapa a mina, ni ku baeza masole, kuli ba zamayange kwapili a koloi

ya hae, ni ku lwalanga lilwaniso ni malumo. Isiñi seo fela, kono uka biza bana ba mina ba basizana, kuli ba besange sinkwa, ni ku ba zwisa ku mina, kuli ba fepange limpi. Mi,” ali, “ha ki zeo fela, uka zwisa mitelo yeñwi ku mina, lipeu za mina kaufela, ni masheleñi e muhola kaufela. Uka ekeza kwa mitelo ya zeo kaufela, kuli aeze likoloti zeñwi za muuso, ni zeñwi cwalo, zeo li ka lukela kulifiwa.” Ki hali, “Ni sepa mina, kaufela, mueza mafosisa.” Kono he . . .

<sup>46</sup> Sicaba sa li, “Kono niteñi lu sa bata kuba inge batu babañwi kaufela.” Kuna ni nto yeñwi ka baana ni basali, kuli ba tabelanga kuba sina mutu yomuñwi. Mi kamita kubile muuna alimuñwi fela yakile apila mwa lifasi yanali mutala wa luna, mi yani neli Yena ya na lu shwezi luna kaufela, ki Mulena luna ni Mupulusi, Jesu Kreste. Nali mutala o petehile wa mo lu lukela kubela, kamita na tokomela musebezi wa Ndate, ni kueza se si lukile.

<sup>47</sup> Mi hakuna taba Samuele mwa na likezi ku susueza sicaba, ka tundamo ba mu hapeleza, musihali ni busihu, “Lu bata mulena. Lu bata mutu. Lu bata mutu yo lukona kubulela kuli, ‘Yo ki yena muzamaisi wa luna.’”

<sup>48</sup> Mi yeo yali kuba ibe tato ya Mulimu fateni. Yali kuba ibe tato ya Mulimu, kamba mane haiba kuba tato ya Mulimu, kuli mutu a buse mutu yomuñwi. Mulimu ki yena ya busa mutu. Mulimu ki yena Mubusi wa luna, Mulena luna.

<sup>49</sup> Mi ki nto yetuna, tuna luli ya butata bwa kacenu, kakuli muuna yani ubonahala kuba ni mulelo o cwalo. Ha ba bonahali kukona kulemuha kuli Mulimu u sa busa mutu, kufita kuli mutu abuse mutu.

<sup>50</sup> Kacwalo baiketela ili bona muuna ya bizwa Saule, ya nali mwana wa Kishi. Mi nali muuna ya kateleha, muuna ya kutekeha. Kono na swanelwa ki sicaba hande luli, kakuli nali yomukima, yomutelele, wa maoyo, sinata sa muuna. Mañolo abulela kuli nali toho ni maheta fahalimwa muuna kaufela mwa Isilaele. Na bonahala fela bulena-lena, mi neli yomunde kwa sifateho. Nali ya talifile mi ili muuna ya ipitezi mwa lika za mubano.

<sup>51</sup> Cwale, woo kona mufuta wa muuna o ba lata batu kuketa kacenu. Sicaba ha si bonahali kuikutwa kulikana ni nzila yeo Mulimu atomile mwa Keleke ya Hae, kuli ba busiwe ni ku zamaiswa ka Moya o Kenile. Ba bata mutu usili, muuna yomuñwi, kopano yeñwi, sicaba sesiñwi cwalo kuli si buse Keleke. Kuli, habakoni ku inepela ili bona ka kutala mwa lizoho la Mulimu, kuli babe ba moya, kuli ba etelelwe ka Moya o Kenile. Ba bata mutu ya ka ba ezeza bulapeli bwa bona, mutu ya ka ba bulelela fela mwa ku ezeza, ni lika kaufela ka zona.

<sup>52</sup> Kacwalo muuna yo abonahala kuswanela sibaka handende, kakuli nali muuna ya na ni ngana hahulu.



53 Mi kaufela za swana ni kacenu. Lu tabela kuketanga batu ba bacwalo, ni luna, kuli ba buse likeleke za luna, ku busa Keleke ya Mulimu. Hakuna ze Ni lukela kunyaza ka zona, kono ki mukwa fela wa ku kondisa litaba, kuli: ha ki yona, ne si yona, mi haina kuba kuba yona tato ya Mulimu, kuli ze cwalo liezahale. Mulimu ki yena ya lukela kubusa sicaba sa Hae, kuzamaisa mutu ni mutu.

54 Mi lu fumana kuli yoo mwana mushimani wa Kishi, muuna yomutuna, ni—ni sibupeho sa hae, mi ni. . . Na bonahala kuswanela sicaba, kuli kubo fa liheta la hae neika bonahala hande. Ni kuwani ya bulena kwa toho ya hae, neli ya ipitezi luli fahalimwa sicaba sesiñwi kaufela, ha zamaya cwana, neikaba inge—inge sibyana sa luli kwa mubuso wa Isilaele. Kakuli, malena babañwi ba ka, ba linaha zeñwi, ba ka nahana kuli, “Amutalime muuna wateni!” Mo ne ba ka supela munwana wa bona ni kubulela kuli, “Mutalime kwanu, ha ki mulena kwa butuna ye lunani! Mutalime ha ki muuna kwa butuna ya lu busa!”

55 Mi ki maswabi kubulela cwalo, kono ki niti mo kuinezi kacenu ni keleke, ba lata kubulela kuli, “Mulisana wa luna ha ki muuna wa ngana ye sisani. Ki muuna yomutuna. Ki muituti wa lituto zepahami kuzwa kwa Hartford, kamba sikolo sesiñwi sesituna sa bulapeli. Una ni ma digiri amane a *kuli-ni-kuli* mwa sibaka. Mi ki mutu yaziba hande kupila ni batu.” Kaufela zeo zakona kuba hande, ni kuba ni libaka za zona. Kono nzila ya Mulimu kwa Keleke ya Hae ki ku etelwa ka Moya o Kenile, ni ka Moya wa Hae.

56 Kono bona ba tabela kubulela kuli, “Luna ni kopano tuna ye lufumaneha ku yona yee. Ne lu kalezi kwa kale mwa mazazi a batateki, ha ne lu sali fela babanyinyani, sicaba se si likani fela, batu babanyinyani. Mi cwale se luli babañata kuli mane konji sibaka se luli mwahala likopano zetuna hahulu ku zeliteñi. Luna ni likolo zende hahulu, ni bakutazi babaitutezi mukwazo. Luna ni sicaba se si ziba kutina hande. Ni batu baba itutile hahulu ba mwa muleneñi ba tahanga kwa kopano ya luna. Mi lwa fanga ku ba batokwile. Mi lueza likezo zende, ni ze cwalo kaufela.” Mi hakuna zeñwi hape, Mulimu wa hanisa, kuli Ni bulele linzwi lililiñwi la kunyaza zeo, kakuli zeo kaufela ki zende.

57 Kono, nicwalo, ha ki tato ya Mulimu kuli mutu abuse mutu yomuñwi. Mulimu lu lumile, ka Lizazi la Pentekota, Moya o Kenile kuli ubuse mwa lipilu za batu, ni kuli ubuse mwa bupilo bwa hae. Ne li sa lukeli kuba kuli mutu abuse mutu yomuñwi.

58 Kono lu lata kubulelanga cwalo. Ki nto yende luli yeipitezi ha lukona kubulela kuli lu ba siemba sa kopano yakuli.

59 “Kana u Mukreste nji?” Kona mo Ni palelezwi fa taba ye, hane Ni li kwa sipatela. Mi Ni ka buza mutu kuli, “Kana u Mukreste nji?”

“Ni wa siemba sa *kuli-ni-kuli*.”

“Kana u Mukreste?”

“Ni wa siemba sa *kuli-ni-kuli*.”

<sup>60</sup> Mi nasi wa mwanana ataha kwa mumbeta wa sipatela, kone Ni bala Bibebe, mi neli—neli nasi yomunca mwa sibaka. Mi ki hali, “U i kutwa cwani.” Ki hali, “Ni lumela kuli ki wena Rev. Branham, utile ku to itatubisa.”

Se nili, “Ki na.”

<sup>61</sup> Mi ki hali, “Ni ku toze mwa mukokoto, kuli u i kutwe kukatuluha nyana ka mulyani woo?”

Mi se Nili, “Wa kona kueza cwalo.”

<sup>62</sup> Mi ha na sweli kutoza mukokoto waka cwalo, a bulela kuli, “U wa kopano ifi ya keleke?”

<sup>63</sup> Mi se Nili, “Oh, Ni wa siemba sa kopano ya kale kale yeliteni.”

Mi ki hali, “Ki kopano mañi yeo?”

<sup>64</sup> Se nili, “Ki yona ye ne ongaongilwe lifasi li si ka pangiwa kale.”

<sup>65</sup> Mi, “Oh,” ki hali, “sikamañi? Ha ni lumeli kuli Na i ziba cwalo.” Ki hali, “Ni wa kwa keleke ya *kuli*. Kana kona kopano yeo?”

<sup>66</sup> Se nili, “Batili, ima. Foo neli fela myaha ye mianda yemibeli kwa mulaho, kopano yeo. Kono kopano ye ne ikalezi fo ne li kalezi kuopelela linaleli za kakusasana hamoho, ni bana ba Mulimu ha ne ba huweleza ka tabo, ha ba bona Kutaha kwa Mupulusi ku to liulula batu.”

<sup>67</sup> Mi sa tuhela ku ni toza mulyani mwa mukokoto. Mi Ne ni inamisizwe nyana, inge *cwana* ka nzila ye, kuli kalibe ani lambe. Mi na zwelela bukaufi ni Corydon, ona kwanu. Lwa kala kuambola. Mi ki hali, “Muñaka, Ni bile ni lumela kamita kuli haiba Mulimu nali Mulimu, U sali Mulimu, kacenu, sina fela mwa Na bezi mwa mazazi a kale.” Ki hali, “Kamba keleke yaka ya hana zeo, kono Na na lumela kuli ki Niti.”

<sup>68</sup> Mi se Nili, “Ha u yo kwahule ni Mubuso wa Mulimu, kalibe.”

Ki hali, “Haiba Na li mufolisi, kana Ha ki mufolisi ni cwale?”

Se nili, “Yena luli u cwalo, kezela ka.”

<sup>69</sup> Kono mutu ubata kubusa, ni ku busa mutu. Mi mutu ubata kuli mutu yomuñwi a mu buse. Ha tabeli kuli Mulimu abuse.

<sup>70</sup> Kacwalo mwana mushimani wa Kishi yoo, Saule, ka libizo, neli yena kalabo fela ku ze ne ba bata, muuna yomutuna wa mwa naha. Mi ni . . . Oh, na ka baisa fela kwa lindwa za bona, ni zeñwi cwalo. Kono, niteñi, ne si nzila ya Mulimu mwa kuezeza lika. Mulimu na bata mupolofita wa Hae ya supezi ya sepahala kuli aba zamaise, ni kubulela Manzwi a Hae ku bona.

71 Cwale, kacenu, mwa lusika lwa luna lo lutuna lwa keleke mo lupila, luna, Na sepa, ni kulumela cwalo ka pilu yaka kaufela, kuli lu se luile ka kushutana ni za na lu tomezi Mulimu kueza. Manzwi a mafelelezo a Mupulusi wa luna mwa Mareka 16. Ali:

*Muye cwale mwa lifasi kaufela, mi mukutaze evangeli  
kwa sibupiwa kaufela.*

*Ya lumela mi akolobezwa ukapiliswa; . . . yasike  
kulumela ukabeiwa mulatu.*

*Mi lisupo ze likaya ni ba balumela; Ka libizo laka ba  
ka leleka mioya; ba ka bulela lipuo zenca ni malimi asili;*

*Mi ha ba ka swala linoha; kamba . . . kunwa . . . sifanu,  
ha lina ku ba tiseza kozi; mi ha ba ka . . . beya mazoho a  
bona fa bakuli, . . . bao ba ka foliswa.*

72 Hakuna mutu, hakuna mwana wa Kishi, kamba hakuna usili fela, yakona kueza zeo kwande a bueteleli bwa Moya o Kenile. Kono lu yahile likolo, lu ezize libaka za lituto za bulapeli, ni kupanga likopani, kuli—kuli li tabise, ni kubonahala inge babañwi ba lifasi.

73 Cwale, Moya o Kenile no banga Mueteleli mwa naha mo. Naha ye ne i busiwanga kwa kale kwani . . . ha ne ba ñozi manzwi a tukuluho. Mi nekuna ni sipula sesiñwi sene sili mwani. Hakuna nihaiba towati iliñwi ya kukakanya mwa munahano waka konji fela za beile Mwana Mulimu fa sibaka, naha ye ha ne i tomilwe fa mutomo wa tukuluho ya bulapeli ni tukuluho kwa batu kaufela, ni fa mayemo fela a Linzwi la Kuyakuile la Mulimu.

74 Kono lu sinyize zeo. Lipolitiki; lu beile batu mwateni, mwatasa kuleka ni kulekisa, ni lisepiso za buhata. Kufitela . . . Naha ya luna, ni lipolitiki za luna, ni za tukuluho ya luna, li sinyehile hahulu kufitela hase—hase li zwakani ni za tutengo twa swalisano ni mifuta kaufela ya tutengo.

75 Mi linako zeñata lu bizanga kuba ni linako za tapelo, kanti tutengo twa linaha twa kopanaa, mi kuna . . . kamba kuba ni lingambolo. Mi mwa nako iliñwi ye zibahala, kwa mulaho nyana, ne kusina nihaiba nako yene bizwa ya tapelo. Lu ka feza cwani lifapano za luna kusina tapelo? Lukona ku kulubela cwani mwa lifasi kaufela, kuli lukone kueza sika kaufela kusina bueteleli bwa Moya o Kenile?

76 Kono mutuhele ni bulele cwana ka lilato ni likute kwa naha ya luna ni kwa ndembela ya yona, ni kwa nyangela yeo i yemela. Lu hanile Mueteleli wa luna, yena Moya o Kenile, ni ka lipolitiki ze sinyehile ka buitati lu tisize mwateni baana ba minahano ye lyanyani. Mi ha mu sa tokomeli, ba ka eza iliñwi ya mafosisa amatuna hahulu ku ebakile baeza fateni, ka nako ya cwale, ki mukwa wa kuli batu ba lakaza kuli batu ba buse.

77 Se lu tokwa mwa nkambe tuna ya United States ye, sina mueteleli wa naha, se lutokwa mwahala ba Congress, se lutokwa

mwa miyaho yaluna ya likatulo, ki baana ba bafile bupilo bwa bona ku Mulimu, mi ba tezi Moya o Kenile, mi ba zamaiswa ka tamaiso ya Hae ya Bumulumu. Kono, mwa sibaka sa zeo, lu keta baana ba ngana fela ya nma, baana babana ni “mibonahalelo fela ya bulapeli, kono inge ba latuzi Mata a Mulimu,” baana babali kwahule ni kuziba za mulena, mane fokuñwi kufitelela ni foo, kona bo lu kenyzize mwa likwenda za luna za lipolitiki, ki naha ya luna.

<sup>78</sup> Ha ki seo fela, kono ni mwa likeleke za luna. Likeleke za luna libile ze sinyehile ka mayemo a kuli luna, ka kuketa balisana ba luna kuli ba lu lise, lu ile kwa mikopano ya bulapeli mi lu ketile baana babali babatuna mwa ngana ya mangangalume, baana babana ni bunangu hahulu mwa ngana, baana babana ni lituso za lituto za likolo, mi ki baba ziba kupila hande ni sicaba, mi ki baana babatuna mwa lilalo mo bapila, ili zeo mane ha Ni li nyazi. Baana babana ni musa mwa mizamao ya bona, baba tokomela mizamao ya bupilo bwa bona, ni mo ba ikezeza mwahala baana babañwi, ni mwahala sicaba, baana babatuna mwa masimu a bona, zeo mane ha Ni buleli bumaswe ka zona. Mulimu halati kuli moya waka ube o maswe cwalo. Kono, niteñi, zeo ha ki zona za na luketezi Mulimu.

<sup>79</sup> Ki zamaiso ya Moya o Kenile: Krete mwa pilu za batu. Buñata bwa baana ba ngana ya butu bani baba yema fa katala ba latuzi kubateni kwa niti kwa Moya o Kenile. Buñata bwa bona ba latula kubateni kwa foliso ya Bumulumu ni Mata a Moya.

<sup>80</sup> Ne ni sweli kubala taba yeñwi, Na sepa neli lona, mukoloko wa makande a mutende litaba zezwa ku Jack Coe, nyandi Jack Coe, ki . . . alimuñwi wa be ni tisize ku Mulena Jesu, yanali sinata sa muuna wa ndume, mwa lizazi la hae. Mi a bizezwa kwa lipuzo, kwani kwa Florida, bakeñisa ku kupa mwanana kuli atubule lisipi za kuzamaela kwa mahutu a hae, ni kutaha kwa katala. Mi ka kuezwa cwalo, mwanana a zamaya kutaha kwa katala, hande inza iketile, ni ku to wa hafita ku bo mahe. Kaufela neli fela tukiso ya sila sa Krete, musizana yo ni muuna hae batisa muzwale waluna wa ndume mwa likuta za naha.

<sup>81</sup> Mi cwale keleke kaufela ha ne ilukela kuyemela Muzwale Jack, foo muuna kaufela wa keleke ya biza Libizo la Jesu Krete ha na lukela ku muyema kwatuko, ka kutiya, mutu kaufela ya biza fa Libizo la Mulena Jesu na lukela kuwa ka mañwele a hae mwa tapelo. Kono, kufita kuezwa cwalo, mwa litho za litaba za mitende, iliñwi ya likopano zetuna hahulu ya bulela kuli ne ba swalisani ni baba salumeli za mulena, ni kunyaza, mane ku mu nepela mwa tolongo Muzwale Jack Coe. Kana mwakona kunahana kuli keleke, yeipiza ka Libizo la Krete, ha i swalisana ni ya sa lumeli za mulena, ni kunyaza muuna wa bumulumu ya na lika ka pilu ya hae kaufela kuyemela Bible? Kono ne ba ezize cwalo.

Mi cwale Muzwale Gordon Lindsay a to mu lamulela.

<sup>82</sup> Mi cwale muatuli ya sa lumeli ali, “Muuna yo ki lisholi la mashelefi kakuli ungile milamu ya kuzamaela ya mwana yani ni ku mu luma fa katala, mi a bulela kuli na ‘folisizwe.’ Kanti na puma, mi aeza nto yeshutana kwa litaelo za madokota, kacwalo una ni mulatu wa kuuzwa mashelefi.”

<sup>83</sup> Mi Bo Coe ba nanuha, ni kubulela kuli, “Muñaka, Na hana taba yeo. Mulimu ki yena ya folisize mushimani yani.”

<sup>84</sup> Mi muatuli ali, “Ni ka buza mutu kaufela mwa kuta moo haiba taba yeo yakona kuba ya niti, kuli Mulimu na folisize mushimani yoo kwa mafelelezo a sibaka sa katala, ni ku mu tuhela kuba ya kula kwa mafelelezo amañwi. Haiba taba yeo yakona kupakiwa ka Bibe, konakuli Ni li Bo Coe bana ni tukelo kwa taba ya bona.”

<sup>85</sup> Mi mukutazi a nanula lizoho la hae, mi sa li, “Muñaka, shangwe, Ni kupa kuli ni tatulule?”

Mi muatuli ali, “Tatulula.”

<sup>86</sup> Mi mukutazi a yema, mi ali, “Busihu bulibuñwi, fa liwate lelisabisa, sisepe nyana ha ne si bata kutiba, sepo kaufela ya kupila ne se ifelile. Ba bona Jesu, yena Mwana Mulimu, a taha inza zamaya fa mezi. Mi alimuñwi wa ba apositola, wa libizo la Pitrosi, ali, ‘Haiba luli ki Wena, Mulena, ni lumeleze ni tahe ku Wena fa mezi.’” Mi ki hali, “Mulena ali ku muapositola Pitrosi, ‘Taha.’ Mi a zwa mwa mukolo, muñaka, azamaya hande fela inge mwa na zamaela Jesu, kuzamaya fa mezi. Kono ha to kala kusaba, akala kutiba a si ka fita kale ku Jesu.”

Muatuli ali, “Taba i kwalilwe.”

Lu tokwa bueteleli bwa Moya o Kenile, isiñi baana ba ngana ya butu fela.

<sup>87</sup> Saule, mwana wa mushimani wa Kishi, a ezwa kapitao fahalimwa sicaba, ni anga baana ba ba likiti zepeli, mi Jonatani anga baba kuma fa sikiti. Mi Jonatani aya kwa mafulo a masole mi a yo bulaya sikwata tuna sa Maamoni, Maamoni, nitaluse. Mi cwale—cwa ha na ba natile, Saule aliza tolombita, mi ali, “Mwa bona sa ezize Saule.” Akala ku ikuhumusa.

<sup>88</sup> Mutu a sa kala fela kuba Dokota yomutuna wa za Bulapeli, kamba kuba ni nto yeñwi yetuna kwa libizo la hae, uba yaswana, sina, ya ziba lika kaufela.

<sup>89</sup> Baana ba Mulimu ba ishewa. Sicaba sa Mulimu ki batu baba ishewa. Ha mu bona mutu ya bulela kuli u amuhezi Moya o Kenile, mi ukala kuikaba ku babañwi, kubonahala kuli, haana Tumelo, u zamaya fela, inza lika kuba nto ya si yona, muhupule fela, yoo ha si ka amuhela Mulena Jesu.

<sup>90</sup> Mi lu fumana kuli sila akeni. Mi na ka taha mwa sikwata nyana sa sicaba sa Mulimu, mi na ka to kula liito la kwa silyo la muuna kaufela.

<sup>91</sup> Cwalo kona sila mwa likela kuezezanga, ku kula meto amabeli kaufela, haiba akona, ili kuli sicaba si si ke sa bona ze si eza. Seo kona Satani sa lika kueza kacenu ku Mukreste kaufela, ku kula meto a hae a moya, kuli akone fela kulatelela ngana ya butu ya lika, mi isi ngana ya Moya o Kenile kuli i mu buse.

<sup>92</sup> Mi kacwalo ha ba to eza cwalo, ha ku to taha kukomiwa kokutuna, konakuli Saule abulaya likomu zepeli ni ku li lumela kwa sicaba. Mi Ni lakaza kuli mu lemuhe fa, fani Saule ha na lumile matunula a komu kwa Isilaele kaufela, ki hali, “Mubone kuli mutu kaufela ya si ke alatelela Samuele ni Saule, yoo cwale, komu yee, abe sina *cwana*.” Kana mwa bona mwa na likezi kuitahisa ili yena ka bupumi ni muuna wa Mulimu? Kuli—kuli ne si ka bukreste! Sabo ya sicaba neli bakeñisa Samuele. Kono Saule abanga kaufela kuli ba mu latelele kakuli kuli sicaba ne si saba Samuele. “Ha ba tahe mwa mulaho wa Samuele *ni* Saule.”

<sup>93</sup> Mi ki linako zekai, kacenu, ha lu utwile zeo! “Ki luna Keleke yetuna. Ki luna Keleke ya Kreste. Luna lu ba Church of God. Luna lu ba—ba *kuli-ni-kuli*.” Li tiseza batu kuba ni sabo, mi ba nahana kuli kwani luli kona kwa sebeza Mulimu mwa niti. Mi ha ba bati zamaiso ya Moya o Kenile. Ba ka itakaleza kulatelela baana baba cwalo, kakuli ba tabela kuipilela bupilo bwa bona feela. Ba tabela kulumela ze ba bata kulumela.

<sup>94</sup> Kana mwa bona nji? Moya o Kenile ki yena Muatuli wa luna. Mulimu ali kuba alufe pope, kamba bishopu, kamba mutu usili fela, kuli abe Muatuli. Moya o Kenile, yena Mutu wa Mulimu, mwa mufuta wa Moya o Kenile, ki yena Muatuli wa luna ni Muzamaisi wa luna. Cwale, kiñi hakuli cwalo?

<sup>95</sup> Shangwe mu swalele kutokwa likute kwaa, mane ki mubulelelo osina likute luli. Ha ni talusi kuba ya itata. Ni bulela cwalo ka lilato.

<sup>96</sup> Kono Moya o Kenile ubulela kuli ku maswe kuli bahame ba luma ba kute milili ya bona. Mi ku maswe kuli bahame ba luna ba apale tuputula to tu kuswani ni malukwe, ni kulombweka milomo yabona ni lifateho mipende. Moya o Kenile ubulela kuli ku fosahalile.

<sup>97</sup> Kono lubata batu baba ka lu bulelela kuli ku lukile, “Haibile fela lu latelela na ni Samuele.” Ba tabela kupila mwahala mazazi a silezi kaufela, ka mo ba latela kaufela, mi baye kwa keleke la Sunda kakusasana. Mi ni muituti wa kwa koleji yende ya ngana ya butu yana ni ma digiri amañata yakona kubulela kutazo ku bona yeka. . . lisheha nyana mwateni, leluka tikinya lizebe za mina ni kueza kuli litabise, inge filimu yeñwi kamba tukiso ya fa mazimumwangala. Ni ku ba lapelela tapelo nyana ya kupeta, ni ku ba kutisa kwa malapa ni mufuta omuñwi wa—wa kuikutwa kulikana kuli bakondisize zetokwahala za bulapeli bwa bona. Yeo ha ki tato ya Moya o Kenile.

98 Moya o Kenile ubata kuli mupile ka bumulumu, zazi ni zazi mwa sunda, ni busihu ni busihu, kuikambusa ili mina kwa lika za lifasi.

99 Kono keleke ha i lati cwalo. Ba bata muuna yakona ku—yakona kutoloka Biblele ka mukwa o ba bata kuli I tolokiwe. Habana kuteeleza kwa linzwi la Moya o Kenile le li bulela kufitela mwa Biblele. Buñata bwa bona ba tabela kubulela kuli, “Mazazi a limakazo a felile.” Zeo kona ze tikinya sicaba. Ba bata kubulela kuli, “Hakuna kolobezo ya Moya o Kenile.” Sicaba ha si lati kueza ka kushutana kufita ba ba siyezi ba lifasi mo ba ezeza. Ha ba lati kuba mwa mikwakwa ni kuba ni kutapa kwa lifateho, ni—ni baana babana ni lifateho ze kenile, mi isi kwai mwa milomo ya bona, ni—ni mishanga ya kwai, ni lipipi, ni—ni lika ze baezanga baana. Mi basali babata kukuta milili ya bona kueza yekuswani luli, mi—mi ba apezi lindelesi zekakatezi, ni ka kubona mifuta ya bona, ni lika ze ba bata. Bona—bona ba bata baana babaka ba bulelela kuli, “Kaufela li lukile.”

100 Mi, busihu bobuñwi, kwataha muuna yana ti lo ni bulelela, kuli bakeñisa kuli ne Ni kutalize hahulu kunyaza zeo, kuli kopano yetuna, mwendi ze ketalizoho za yona, bali, “Lu ka wisa Muzwale Branham mi hakuna ze luka ezanga ni yena. Uka kutisa matepu ao, ni kukupa swalelo ka ona, kamba lu ka ku wisa.”

101 Mi nali, “Ni ka yema ka Linzwi la Mulimu. Haiba li ka zwisa kaufela mwa bupilo bwaka, Ni ka siyala ni Linzwi. Mi Na . . .”

Bali, “Kihande, haiba upalelwa ku kutisa tepu ya *kuli-ni-kuli*?”

102 Se nili, “Nali kuba ni kutaze sika sifi kaufela, mwa bupilo bwaka, se Ni kile na swabela. Hakuna matepu e ni ka kutisa kamba lipiho. Ni siyala ni so bulela Moya o Kenile. Kuli Ni pila ka sona ni kushwa ka sona.” Ha ni liki kuitumba za ka cwale. Kono Ni lika fela ku mi fa taba ya ze sweli kuezahala, kuli mubone ni ku utwisisa. Ki sicaba se si tabela ku zamaiswa ka batu.

103 Ne ba sa lati Samuele. Mi ba si ka toza kale Samuele kuba mulena . . . kamba Saule, mulena, mu ni swalele, Samuele ataha ku bona hape. Mi Ni ka bulela fela ka mushobo wa na lukela kubulela ka ona kambe ki kacenu. Mwakona ku ubala. Na ize, “Ki butata mañi bobuliteni Mulimu haaba Mulena mina?”

“Kihande, Mulimu ha lu mu boni.”

104 “Kihande, Kina muyemeli wa Hae.” Samuele abulela. “Kana Ni kile na mi bulelela mafosisa fateni? Kana Ni kile na polofita sika kaufela se ne si si ka ezahala sina ha Ni kile na bulela kuli si ka ezahala? Hanili Ni mi bulelezi Linzwi la Mulena? Mi Ni ka mi buza nto ye. Kana Ni kile na taha ku mina ku to mi kupa masheleñi? Kana Ni kile na nga sina ku mina? Kana Ni kile na mi tiseza sika kaufela haisi se si zwelela kuza kuli

KISONA SA BULELA MULENA? Mi Mulimu u si bonisize, ka nako kaufela, kuli ne li Niti.” Mi A lumile mushika ni pula (Mwa ziba Liñoło leo, mina, ona foo.) ku paka kuli Samuele nali mulomo wa Mulimu.

<sup>105</sup> Mi Samuele hana yemelwa handende, kacenu, ki Moya o Kenile. Moya o Kenile kona mulomo wa Mulimu o bulela lika ona cwalo fela ka swanelo sina Biblele mo i bulelela, kuli mulumele fela Biblele se i bulezi, mi hauna ku shutana ku Ona, ni hanyinyani.

<sup>106</sup> Kono ne ba bata mutu yomuñwi ya na ka ba bulelela ze shutana. Mi sicaba ne ba sa buleli kuli sipolofita sa Samuele ne li buhata. Ba alaba ni bali, “Samuele, kaufela zo bulezi ka Libizo la Mulena, Mulena u li petile kuya ka mo kile wa bulelela. Hakuna nihaiba mafosisa amakana. Wa li kuba utahe ku luna ku to lu kupa masheleñi. U i ponezi za hao. Ha u si ka lu kupa kueza sika kaufela se situna, nto yetuna yeipitezi kuli lu ku ezeze yona. U sepile ku Mulimu wa hao, mi U ku lamulezi kwa litaba zeo kaufela. Mi manzwi a hao ki a niti. Lika kaufela zo bulezi ka Libizo la Mulena libile fela kuya ka mo li bulelezi. Kono ni cwalo lu bata mulena.”

<sup>107</sup> Kana mwabona twaniso? Kana mwa—mwabona bu—bu butali bwa diabulosi, kuli bwakona kubeleka ku mutu? Mwa sibaka sa kuipeya kwatasi a Moya o Kenle abe muuna kamba musali, ni kuteeleza ku se sili KISONA SA BULELA MULENA, kwa bupilo bo bupetehile, sibupeho se si sika silafala, kwa bupilo bo bu shutani, sicaba se si ipitezi, naha ye kenile, sicaba se sina ni likezo ze ipitezi; bona ba itakaleza kutamahana ni lifasi, ni kukeza inge lifasi, ni kuya kwa keleke yeñwi ye bulela kuli, “Kaufela li lukile, kueza fela ona cwalo ni kutundamena.”

<sup>108</sup> Kana mwabona mo li inezi? Ba li, “Hakuna nto yecwalo ya kuli foliso. Oh, kolobezo ya Moya o Kenile neli sikombole kwa keleke.” Ka manzwi amañwi, kipeto Mulimu anga batu, anga Moya o Kenile kuzwa mwa Keleke, mi atuhela kuli kopano I hule. Hakuna, hakuna. Hakuna nto ye cwalo. Moya o Kenile, Linzwi la Niti, neli lukela ku mi zamaisa kufitela Jesu ataha. Kono cwalo mo—mo li zamaezi.

<sup>109</sup> Saule abeiwa fa bulena. Yena ka butuna . . . A ba ni nyangela tuna ye mulatelela. Oh, nana ni lilwaniso zende. Nana ni baopeli. Nana ni litebe, mi nana ni malumo. Oh, a fitela kwahule linaha zeñwi kaufela. Mi abatisa mwa tukuluho ye ne fitelela sika kaufela sa kile autwa mutu ufi kaufela.

<sup>110</sup> Mi seo kona luli likopano za luna se li ezize kacenu. Luna ni miyaho yemituna hahulu ya likeleke mwa lifasi. Luna ni sicaba se si ziba kutina hande ka bukwala hahulu mwa lifasi. Luna ni lituso zetuna za masheleñi a likolo zekona kutisiwa.

<sup>111</sup> Sina baana baba lutilwe ba Saule bene ba lwezi lilumo lani, mi nebakona ku li zamaisa ni kushimbuluka ni lona kufitela



linaha li ba saba. Ne bali sicaba se si lutilwe, ni zeñwi kaufela. Kono, zazi leliñwi, kwa taha nako yene kubile ni kangisano. Mi za tabisa hahulu mpi ya Maisilaele kufitela ba yema, inge ba ngangama mwa makatulo a bona. Goliati aba tiseza kangisano, “Haiba Mulimu wa mina u inzi mo mu bulelela kuli kona Mwa inezi! Kona kuli mu lutilwe hande.” Mi aba swabisa. Ne ba sa zibi sa kueza. Lilwaniso za bona, ze kenisizwe za palelwa kubeleka. Malumo a bona na palezwi ku beleka. Ne kuna ni se ne ba si ka utwa kale, haisali, se ne si ezahala.

<sup>112</sup> Mi ka likute kaufela ni likute la bumulimu, ni swanelo ni likute luli, ni lilato ni kutwano ya Bukreste, kona ha Ni bulela se. Ne ni bala, zazi leliñwi, mwa mutende wa kwa Africa, ko kuna ni mwana luna wa Kishi yani, mukomi wa luna wa kuhasanya evangeli, fani wa Mohammedan a mu swabisa, Billy Graham. Ali, “Haiba Mulimu wa hao ki Mulimu, Ha folise bakuli sina Ha bulezi kuli Uka folisa.” Mi Mwana mushimani wa Kishi, ni babañwi ba mpi, ba i kambusa ni kuzwa mwa naha, ba tulwa. Ki maswabisa. Mulimu wa luna ki Mulimu.

<sup>113</sup> Luna ni likeleke zaluna zende. Luna ni kuhasanywa kwa evangeli kwaluna kokunde. Luna ni baopeli baluna baba holanga. Luna ni likwata zaluna zende; luna ni lituwa zetelee hahulu mwa naha. Luna ni baana babande hahulu, buñata bwa maseheñi amañata luli. Luna ni bo caziba. Luna ni lituto za bulapeli zeipitezi; lwa kona ku likutaza; lwa kona ku libulela. Lwa kona ku hasanya evangeli ni kutisa sicaba mwateni, mi lupanga ma milioni mwaha ni mwaha, ka baba fetuhezi kwa liseli, kutaha mwa keleke. [Hakuna manzwi fa tepu—Mu.] Baopeli ba luna ba ba holanga, kuhasanya kwa evangeli kwa luna ku talifile, ha ku zibi za kukopana ni butata bo bucwalo. Hakuna ze ba ziba ka zona. Hakuna ze ba ziba ka mata a Hae a kufolisa, ka kolobezo ya Moya o Kenile, za Mata a kona kunga muluti wa mutu ya shwa kwa kansa, ni ku mu lukulula. Hakuna ze ba ziba ka zona. Ha ba si ka lutiwa mwa neku leo, sina Saule ni sikwata sa hae sa na ipangezi mo ne siinezi.

<sup>114</sup> Kono halu noboneñi ni bulele kwa sicaba sa Mulimu, ni ku mina bana, kuli mukone kuziba kuli Mulimu ha mi siyangi kusina paki.

<sup>115</sup> Kusina kuziba, ku Saule, Saule hakuna za na ziba ka zona. Kono Mulimu nana ni Davida yomunyinyani kwa mulaho wa lilundu kokuñwi, ya na sa fepi lingu ka bucwani bwa bulapeli. Na sweli ku i sa kwa mezi a kuzize ni mwa mafulisezo amatala. Na tokomela lingu za ndatahe. Mi haiba mutu na ka taha, ali sila, kuli apamule iliñwi ya lingu za ndatahe, na ziba Mata a Mulimu kuli aka lamulela ngu yani.

<sup>116</sup> Mulimu u sa na ni Davida, kokuñwi, ya ziba se si taluswa ka kulamulela iliñwi ya lingu za Mulimu, ka Mata a Mulimu. U sa ziba kaufela ka zona.

<sup>117</sup> Na sepile. Hakuna sa na ziba ka lilwaniso za Saule, kamba mane na sa li lati. Na sa lati ifi kaufela ya likopano za bona. Na sa lati lilwaniso kuapala lilwaniso za kale zani. A bulela kuli, “Hakuna ze ni ziba ka zona. Kono halubone ni ye ka Mata e Ni ziba.” Na lisize lingu za ndatahe. Na tokomezi mafulisezo. Na li file lico ze lukela mi zende, mi za pila ni kununa.

<sup>118</sup> “Mutu hana kupila ka buhobe fela. Kono ka Linzwi kaufela le li zwelela mwa mulomo wa Mulimu, mutu u ka pila.” Mulisana wa niti wa li fepa. “Jesu Krete wa swana maabani, kacenu, ni kuyakuile.” Mi haiba sila si ka pamula iliñwi, mwa butuku, wa ziba Mata a Mulimu.

<sup>119</sup> Amutalime Davida yomunyinyani, inza yemi fani. Ali, “Mutangana yani ki ndume, kuzwa kwa kupepwa kwa hae. Mi kuzwa kwa bunca bwa hae, hakuna za na ziba konji lilumo ni lilwaniso. U lutilwe hande. Ki munituti wa za bulapeli. Mi hakuna zo ziba ka zona.”

<sup>120</sup> Ki hali, “Yeo ki niti, sha. Hakuna ze ni ziba ka tuto ya hae ya za bulapeli. Kono kuna ni nto iliñwi ye Ni ziba, kuli, ha ne kutile sila, ku to nga iliñwi ya lingu za ndate, Na i latelela ka Mata a Mulimu. Na i lamulela. Na i kutiseza hande kwa buiketo hape. Na itisa kwa mafulisezo amande a matala ni mezi a kuzize. Mi Mulimu ya na file tau mwa mazoho aka, mi Na i bulaya ha i to swala iliñwi ya—ya lingunyana, mi A ni konisa ku bulaya bere, kona ni yena Mulimu wa Lihalimu mwa ka bela ni na kuli ni bulaye Mufilisita yo yasina mupato.”

Lu tokwa bueteleli bwa Moya o Kenile. Ha ni zibi mazazi aka; hakuna mutu ya ziba.

<sup>121</sup> Kakusasa omuñwi Ne ni lobezi mwa mumbeta waka. Mi Ne ni. . . se ni lobezi, mi Na lola kuli Joseph na kula, mi Na mu nanula ku mu lapelela. Mi ha Ni to pasumuka, Na filikana hahulu. Se nili, “Kihande, mwendi Joseph u ka kula.”

<sup>122</sup> Mi Na talima, kwapili ku na, mwa muluti nyana, o munsu, ni taluse muluti o mufubelu cwalo. Mi kwa bonahala inge kuli neli na. Mi Na u talimela. Mi kutaha kwa mulaho neli Mutu usili yomusweu, mi neli Yena. Mi Na talimela fana lobezi musala ka, kubona haiba na zuhile, kuli Ni mu bonise, na bonanga lipono. Kono na sa lobezi.

<sup>123</sup> Se nili, “Oh, Ni swabile, Mulena. Kono, boo ibile bupilo bwaka. Una ni ku ni isa kwa lika kaufela ze Ni ezize. Nako kaufela sika kaufela ha si ezahala, Ne ni nahana kuli ki Wena ya si eza. Mi Ni lemuha kuli ki Satani yalika ku ni isa kwahule ni sona.” Se nili, “Haiba No ka ni zamaisa fela.” Mi ha Ni talima, Na bona sifateho sesinde hakalo kalo se Ni kile na bona fateni sa muuna. Na li kwapili a ka, inza talima kwa mulaho. A nanula lizoho la Hae ni ku ni swala kwa lizoho, ni kukala kuzamaya neku *le*. Pono ya ni siya. Sunda yefelile kakusasana, Ne ni se, ni zuhile kakusasana. Lani neli la Pelekelo, pono ye. Fa. . .

124 Ni bile ni bilaelanga kamita, Ni bile ni nahananga za kushwa. Ki, na kakuba wa myaha ye mashumi aketalizoho, ki, nako yaka ha i si ka . . . ne si sa nahanangi kuli ikaba yetelele luli. Mi Na ikalelwa mo ne Ni ka bela mwa mubili wa bungeloi wani, mubili o sa shwi. “Kana ikana yaba kuli Ni ka bona balikani baka babande ni, kubulela kuli, mbundu yelikani inge i yanduluka cwalo, ni kubulela kuli, ‘Ki yani Muzwale Neville yaya fani,’ kamba, hakoni kubulela kuli, ‘Lumela, Muzwale Branham’? Mi cwale Jesu ha taha, kona kuli Ni kaba mutu hape.” Ne ni hupula cwalo hañata.

125 Ne ni sweli kulolanga kuli Ne ni inzi kwa Wiko. Mi Na taha mwa sibaka sa macacani, mi musala ka nali nina, mi ne luzwa kwa kushuta linembele. Mi Na yema ni—ni ku kwalula sikwalo. Mi lihalimu neli lelinde luli. Na sa bonahali inge mwa bonahalelanga kwanu. neli a mubala wa ndilu, ni malu amande a masweu. Mi se Nili ku musala ka, Na li, “Ne lu lukela kuba kwanu, kale kale koo, mulatiwa.” Ki hali, “Bakeñisa bana ba luna, ne lu lukela kuba kwanu, Billy.” Se nili, “Yeo ki . . .” Mi Na pasumuka.

126 Na nahana kuli, “Ni sweli kulola hahulu! Na komoka bati?” Mi Na talima fafasi, mi nainzi bukaufi ni na.

127 Mi Na zuha fa musamo waka, sina buñata bwa mina sicaba mo mu ezelize cwalo fateni, na beya toho yaka fa—fa toho ya mumbeta, mi na beya mazoho aka kwa mulaho. Mi Ne ni lobezi fani sina *cwana*. Mi se Nili, “Kihande, Na komoka fela mo ku ka bela, kwa neku leliñwi. Fa ni fitile kale fa myaha ye mashumi aketalizoho, mi Nali kuba ni eze sika fateni. Haiba Ni kona fela kueza sika kutusa Mulena, kakuli Ni ziba kuli Hanina kuba ya shwa. Licika la nako yaka lifelile, mbweshwa, kamba mane kufitelela licika. Haiba Ni pila kuba ya supezi sina sicaba sa hesu, ni cwalo licika la nako yaka ifelile.” Mi Na talima kwa ni kwa. Mi Ne ni lobezi fani, inge ni bata kuzuha. Ne li ka sebene kiloko cwalo. Se nili, “Ni lumela kuli Ni kaya kwa keleke, kakusasana woo. Haiba Ni silez linzwi, Ni ka tabela kuteeleza Muzwale Neville akutaze.”

128 Kacwalo se Nili, “Kana u zuhile, mulatiwa?” Mi na sa lobezi luli kuñanyuka.

129 Mi ha Ni bati kuli mu mbwinje se. Si ni cincize. Ha ni koni kuba Muzwale Branham yaswana mo ne Ni belanga.

130 Mi Na talima. Ki ha Ni utwa Sesiñwi, se si tundamena kubulela kuli, “Kona u kalisa fela. Tundamena kulwana. Zwelapili fela.”

131 Na nyunga toho yaka fa muzuzu. Na hupula kuli, “Kihande, Na mwendi ni sweli fela kunahana lika ze.” Mwa ziba, mutu wakona kuba ni minahano ye cwalo. Mi se Nili, “Ne ni sweli fela kunahana zani.”

La li, “Zwelapili kulwana. Tundamena kuzamaya. Tundamena kuzamaya.”

<sup>132</sup> Se nili, “Mwendi ki Na ya bulezi cwalo.” Mi Na beya milomo mwahala meeno aka, ni kubeya lizoho fa mulomo waka.

<sup>133</sup> Mi fani Sa taha hape, sali, “Tundamena fela kulwana. Kambe wa ziba fela ze li kwa mafelelezo a nzila!”

<sup>134</sup> Mi kwa bonahala kuli Ne ni sweli kuteeleza Granham Snelling, kamba mutu usili cwalo, ya na opela pina cwalo. Ba i opela kwanu, Anna Mae ni mina kaufela.

Ni na ni bulutu ni buinosi, mi Ni bata kubona Jesu.

Ni tabela kuutwa milangu ye munati ya kwa likamba yani ha ilila.

I ka benyisa nzila yaka ni kufeza sabo yaka kaufela.

Mulena, ni konise kutalimela kwabuse bwa lisila la nako.

Mu i utwile ha i opela mo mwa keleke.

<sup>135</sup> Mi Na utwa Sesiñwi ha si li, “Kana u tabela kubona kwabuse bwa lisila?”

Se nili, “Si ka ni tusa hahulu.”

<sup>136</sup> Mi Na talima. Mi fa nako nyana fela, Na...Kubuyela kulikuñwi Na taha mwa Sibaka nyana se si sikami cwalo. Na talima kwa mulaho, mi Na ipona ki na yaale, inge ni lobezi fa mumbeta. Mi se Nili, “Ye ki nto yenca.”

<sup>137</sup> Cwale, Ha ni tabeli kuli mu kutele se. Se si fapila keleke yaka, kamba lingu za ka ze Ni lisa kihona. Kamba neli kuli, Ne nili mwa mubili wo kamba fande, kamba neli petuho, ne i sa bonahali sina pono ku ze Ni kile naba ni zona. Ne ni talimela Fani, mi Na talimela ni fa.

<sup>138</sup> Mi ha Ni yo fita fa Sibaka nyana sani, Na li kuba ni bone fateni sicaba sesiñata sene sitaha si mata, inge ba huwa, “Oh, muzwale wa luna yomunde!”

<sup>139</sup> Mi Na talimela. Mi basali basanana, mwendi mwa lilimo ze mashumi amabeli a bunca bwa bona, eitini kuisa twenti, ne ba sweli ku ni kambeka mazoho, ni kuhuwa kuli, “Muzwale wa luna yomunde!”

<sup>140</sup> Se kutaha mitangana ba sanana, mwa butali bwa bunca bwa buuna. Mi meeto a bona na benya ni kubonala inge linaleli mwa busihu bo bulififi. Meeno a bona amasweu twaa sina macwe a butokwa. Mi ne basweli kuhuwa, ni ku ni swalaka, ni kuhuwa, “Oh, muzwale waluna yomunde!”

<sup>141</sup> Mi Na yema, Na talimela. Mi Na ba mwanana. Na talima kwa mulaho fa mubili wo cembezi o lobezi fani, ni mazoho aka kwa toho yaka. Mi se Nili, “Ha ni utwisisi se.”

142 Mi likalibe za sanana ze inge ba ni kumbatela. Cwale, Ni lemuha kuli se ki sicaba se si kopani, mi Ni bulela se ka bunde kaufela ni ka munati wa Moya. Baana ha mukoni kubeya lizoho la mina ku musali kukumbatela kusina kuutwa mubili kuzamaya; kono ne li si cwalo Kafani. Nekusina maabani kamba kamuso. Ne ba sa katali. Ne bali. . . Na li kuba ni bone basali babande cwalo mwa bupilo bwaka kaufela. Nebana ni milili ya bona kushetumuka ni mwa liteka za bona; likoci zetelele kuyofita kwa mahutu a bona. Mi ne basweli fela ku ni kumbatela. Ne si kukumbatela inge kezela ka fela, yainzi fani, mwa kona ku ni kumbatelela. Ne ba sa ni tubeti, mi Nina ne ni sa ba tubeti. Ne li nto yeñwi ye Ni—Ni samba kuba ni—ni be ni mushobo wa kuitalusa, Hanina manzwi a kubulela. “Kupetahala” halikoni kusutelela kwateni. “Bunde” mane halikoni neba ku ngunyuta kwateni, hakuna. Ne li nto ye Ni samba kuba. . . Mu lukela fela kuyobateni Teñi.

143 Mi Na talima neku *le*, ni neku *lani*. Mi ne basweli kutaha, ka likiti kiti. Mi se Nili, “Ha ni utwisisi se.” Se nili, “Kihande, bana. . .”

144 Mi ki yo Hope ataha. Yani neli musala ka wa pili. Amata, mi na si ka li, “Muuna ka.” Na bulezi kuli, “Muzwale waka yomunde,” mi ha to ni kumbatela. Nekuna ni musali yomuñwi yana yemi kwani, yana ni kumbatezi, mi cwale Hope a kumbatela musali yoo; ni ufi kaufela. Mi Na hupula kuli, “Oh, ye i lukela kuba nto yeshutana. Ha ikoni kuba. . . Kuna ni sesiñwi. . .” Na hupula kuli, “Oh, kana Na kona kutabela kukutela mwa situpu sa bucembele sani hape?”

145 Na talima kafa ni kafa. Na hupula kuli, “Ki sikamañi se?” Mi Na talima, hande kaswanelo. Mi Na—Na li, “Ha—Ha ni utwisisi se.” Kono Hope na bonahala inge, oh, ki yena mueñi ya kutekeha. Na sa shutani, kono inge fela mueñi ya kutekeha.

146 Mi Na utwa Linzwi hape le li ambola ni na, hane nili mwa muzuzu, lali, “Se kona so kutalize kuli kona Moya o Kenile mo u inezi. Le ki Lilato le li petehile. Mi hakuna se si kona kukena Kwanu kusina Lona.”

147 Ni na niciseho luli, kufita sapili mwa bupilo bwaka, kuli si lwala Lilato le li petehile, ku yo kena Mwani. Ne ku sina muuna. Ne ku sina kukatala. Ne ku sina lifu. Butuku ne si yo, teñi Kwani. Mubili wa butu; neusike—neusike wa mi supalisa. Mi ni. . . Ne ba sa lili. Ne li fela tabo iliñwi.

148 “Oh, muzwale waka!” Mi se ba Ni lwala mwahalimu, ni ku ni beya fahalimwa sibaka se si lumbile.

149 Na hupula kuli, “Ha ni loli. Ni sweli kutalimela fafasi fa—fa mubili waka o lobezi fa mumbeta faa.”

150 Mi ba ni toma fahalimu fani. Mi se Nili, “Oh, Ha ni lukeli kuina fahalimu faa.”

151 Mi se kutaha basali ni baana, kuzwa kwa maneku kaufela, mwa kutiya kwa bunca bwa bona, inge ba huwa. Mi musali alimuñwi na yemi fani, mi a huwa, “Oh, muzwale waka yomunde! Oh, lu tabile hahulu ku ku bona Kwanu.”

Se nili, “Ha ni utwisisi se.”

152 Mi cwale Linzwi lene li bulela lani, kuzwa fahalimu aka, lali, “Wa ziba, ku ñozwi mwa Bibebe kuli bapolofita ne ba kopani ni sicaba sa bona.”

Mi se Nili, “Eeni. Na hupula kuli mwa Mañolo.”

Ali, “Kihande, fa kona fo ka kubukanyeza sicaba sa hao.”

Se nili, “Kona kuli bakaba ba niti, mi Na kona kuba utwa.”

“Oh, eeni.”

153 Se nili, “Kono, kuna ni ma milioni. Hakuna ma Branham babañata cwana.”

154 Mi Linzwi lani lani, “Ha ki ba Branham. Bao ki botisize kwa bupilo. Bao kona botisize ku Mulena.” Mi ali, “Basali babañwi bao foo, bo nahana kuli ki babande hahulu, neli ba myaha ye likana nainte ya kupepwa ha u ba tisa ku Mulena. Kona ha ba huwa kuli, ‘Muzwale waluna yomunde!’”

155 Mi ba huwa, kaufela hamoho, bali, “Kambe no si ka itahanela kwapili aluna, ne lusike kuba Kwanu.”

Na talima kafa ni kafa. Na hupula, “Kihande, Ha ni li utwisisi.”

Se nili, “Oh, Jesu u kai? Ni bata ku Mu bona, hahulu luli.”

156 Se bali, “Cwale, Yena u fahalimu nyana, ku kambama nyana fela faale.” Bali, “Zazi leliñwi U ka taha ku wena. Mwabona?” Ali, “No lumezwi, kuba mueteleli. Mi Mulimu uka taha. Mi cwale Ha eza, Uka ku atula kuya ka so ba lutile, pili, haiba baka kena kamba nee. Lu ka yo kena ni tuto ya hao.”

157 Se nili, “Oh, Ni tabile hahulu. Kana Paulusi, kana ulukela ku yo yema cwalo ni yena? Kana Pitrosi u lukela ku yo yema ni yena?”

“Eeni.”

158 Se nili, “Kona kuli Ni kutalize Linzwi kaufela le ba kutallize. Na li kuba ni keluhe ku Yona, neku leliñwi ku leliñwi. Fo ne ba kolobelize ka Libizo la Jesu Krete, Ni kolobelize nina. Fo ne ba lutile kolobezo ya Moya o Kenile, Ni lutile nina. Kaufela se ne ba lutile, Ni si lutile nina.”

159 Mi sicaba sani sa huwa, sa li, “Lwa ziba cwalo. Mi lu ziba kuli lu ya ni wena, zazi leliñwi, luka kutela mwa lifasi.” Bali, “Jesu uka taha, mi u ka atulwa kuya ka Linzwi lo lu kutalize. Mi haiba u ka amuhelwa ka nako yeo, zeo luliziba kuli uka amuhelwa,” mi bali, “kona kuli uka lu isa ku Yena, sina mipuzo ya bulumiwa

bwa hao.” Bali, “Uka lu isa ku Yena, mi, kaufela hamoho, lu ka kuta mwa lifasi, ku yo pila kuyakuile.”

Se nili, “Kana Ni lukela kukuta cwale?”

“Eeni. Kono tundamena ku itiisa.”

<sup>160</sup> Na talimela. Mi Na bona sicaba, ni kwahule kaufela mo ne Ni bonela, inge bazwelapili kutaha, ba bata ku ni kumbatela, ne ba huwa, “Muzwale wa luna yomunde!”

<sup>161</sup> Ona fani fela Linzwi lali, “Kaufela zo no lata, ni ze kile za kulata kaufela, Mulimu u ku file zona Kwanu.” Mi Na talima. Mi se kutaha nja yaka ya kale, yataha inge izamaya. Se kutaha ni pelesa yaka, mi toho ya yona ya beya fa liheta la ka, mi ya lila. Lali, “Kaufela zo kile wa lata, ni kaufela ze kile za kulata, Mulimu u li file mwa lizoho la hao, kuya ka bulumiwa bwa hao.”

Mi Na ikutwa kuli ni zwa mwa Sibaka sesinde sani.

<sup>162</sup> Mi Na talima kwa ni kwa. Se nili, “Kana wa tona, mulatiwa?” Na sa lobezi.

<sup>163</sup> Mi Na hupula kuli, “O Mulimu! Ni tuse, O Mulimu. U si ni tuheleli ku keshebisa ni Linzwi nihaiba li liliñwi. Ni konise kuyema hande ka Linzwi lani, ni ku Li kutaza. Hanina taba ka ze taha kamba zeya, za eza mutu kaufela; ki bo Saule ba bakai ba . . . bana ba Kishi ba ba ka zuha, ki ba bakai ba *se, sani*, kamba *sani*. Ni konise, Mulena, ni i itise kuya kwa Sibaka sani.” Sabo kaufela ya lifu. . .

<sup>164</sup> Ni bulela se, ni Bibeles yaka i beilwe fapila ka, kakusasana cwana. Ni na ni mushimani yomunyinyani fani, wa myaha ye mine ya kupepwa, ya lukela kuhula. Nina ni musizana wa lilimo ze ketalizoho kazene za kupepwa; ni ya mwa bunca, bao Ni itumela ka bona, baba sikuluhezi kwa nzila ya Mulena. Mulimu, ni lumeleze kupila, kuli ni ba hulise mwa taelo ya Mulimu.

<sup>165</sup> Mi fahalimwa seo, lifasi kaufela libonahala ku ni huweleza, basali bahulu ba myaha ye nainte yakupepwa ni baana, ni mifuta kaufela. “Kambe no si ka ya, ne lu si ke lwaba Kwanu.”

<sup>166</sup> Mi, Mulimu, ni konise ku lwana ndwa. Kono haiba litaha kwa kushwa, Ha ni kuzi feela. Ne ku kaba tabo, ikaba tabo, ku yo kena, kuzwa mwa kubola kwa ni maswabisa.

<sup>167</sup> Haiba Ni kona kukwanisa, ku yo punya kwani, ka limaili zelikana mabilioni a mwanda mwa halimu, sibaka se si likanelela, ni lani ki Lilato leli petehile; muhato ni muhato neku le, kwa kumbama, kufitela lu yo fita fo se luinzi cwale. Ikona kuba fela muluti wa kubola, nto nyana yani yelu kona ku lemaha ni ku ikutwa kuli kuna ni sesiñwi kokuñwi. Ha lu zibi kuli Ki sikamañi.

<sup>168</sup> Oh, balikani baka babande, balatiwa baka, bahesu balatiwa ba Evangeli, bana baka be ni ipepezi ku Mulimu, mi ni teeleeze, na mulisana wa mina. Mina, Ni sepa kambe ne Ni kaba ni

mukwa wa ku li toloka ku mina. Hakuna manzwi; Ha ni koni ku lifumana; hakuna ko likona ku fumaneha. Kono kwabuse fela bwa bupilo boo, kuna ni nto ye kanya ye mu si ka. . . Hakuna mukwa wa ku litatulula ka ona. Hakuna mukwa. Ha nikoni fela kueza cwalo. Kono kaufela so eza, mulikani, beya kwatuko lika zeñwi kaufela kufitela uba ni Lilato le li petehile. U fite fa sibaka fo kona kulata mutu kaufela, sila kaufela, sika sesiñwi kaufela.

<sup>169</sup> Poto iliñwi yani Kwani, ku na, si ni ezize mutu ya shutana. Ha ni saba ni kamuta, ni kamuta, ni kamuta Muzwale Branham yaswana yene Ni banga yena. Kamba lifulai za lenda, kamba mamonyi aka laita; kamba litwela uni supile tobolo. Seo sili sona kaufela, ha si bilaezi. Ni ka itiisa kulwana ndwa, ka muhau wa Mulimu. Kakuli, Ni kutalize Evangeli kwa sibupiwa kaufela ni ku mutu kaufela ye Ni kona, inge ni ba hapeleza kuya kwa Naha yende ya mwabuse yani.

<sup>170</sup> Ku kona kubonahala tata. Si kona kunga kuikataza ko kuñata. Ha ni zibi kuli ku kanga nako yekuma kai. Ha lu zibi, kubulela ka buino bwa nama. Ki. . . Kuzwa kwa tatubo ya zazi leliñwi, abulela kuli, “Una ni myaha ye mashumi amabeli ka aketalizoho a kupepwa a manyando ni bupilo bobunde. U tiile.” Sani sa tusa. Kono, oh, ne ku si cwalo. Seo ha si cwalo. Ki nto yeñwi yeli mwahali *mo*. Se se sibola sina ni kuapala se si sa boli. Za nama lina ni kuapala za moya.

<sup>171</sup> Bana ba bashimani ba Kishi bakona kutaha. Ma. . . Lika zende kaufela ze ba eza, Hanina se si maswe se ni bulela ka zona, kufa lituso kwa babotana ni lituso za lilato. Mi muhupule, kiñi, Samuele abulelela Saule kuli, “Uka polofita ni wena hape.” Mi buñata bwa baana bani babatuna, bakutazi babatuna, bakona kukutaza Linzwi inge manduna a mangeloi. Kono ni cwalo ne si tato ya Mulimu. Mulimu na lukela kuba mulena wa bona. Muzwale, kezeli, u tuhele Moya o Kenile u ku zamaise.

Ha lu inamiseni litoho za luna fa nako nyana.

Ni i kutwa hahulu bulutu ni buinosi, mi Ni batga kubona Jesu,  
Ni tabela ku utwa milangu ye munati yani ya ilila;  
I ka monyeha mwa nzila yaka ni kufeza sabo kaufela;  
Mulena, lu konise kutalimela kwabuse bwa lisila la nako.

Mulena, ni konise kutalimela kwabuse bwa lisila la maswabi ni sabo,  
Ni konise kutalimela kubenya kokunde kwa liseli;



Ku ka fa maata kwa tumelo yaluna ni kufelisa  
sabo kaufela;  
Mulena, ba ha talime kwabuse bwa lisila la  
nako.

172 Na kolwa, Mulena, haiba keleke ye, kakusasana cwana, i kona fela kutalimela kwabuse bwa lisila! Isiñi fa matuku ali mwahala bona; ha kukonahali kuba cwalo. Isiñi butuku; hakuna sika kwanda kupetahala. Mi Ki mubuyeleso fela ulimuñwi o mwahali kwanu ni Kwale, kuzwa kwa bucembele kutaha kwa bunca, kuzwa mwa nako kuya kwa Kuyakuile; kuzwa kwa bukamusu bo bu katalisa, ni maswabi a maabani, kuisa kwa nako ya cwale ya Kuyakuile mwa bepetehi.

173 Na lapela, Mulimu, kuli U fuyole mutu kaufela yaliteni mo, haiba kuna ni babañwi mo, Mulena, baba sa Ku zibi ka nzila ya Lilato yeo. Mi kaniti, Ndate, hakuna se si kona kukena mwa Sibaka se si kenile sani kusina mufuta wa Lilato leli cwalo lani, Kupepwa ko kunca, ili kona kupepwa sinca. Moya o Kenile, Mulimu, ki Lilato, mi lu ziba kuli yeo ki niti. Hakuna taba kamba lukona kushimbulula malundu ka tumelo yaluna, kamba luezize lika zetuna, niteñi, kusina Sani kwani, ha lukoni ku pahama manela yani ya lihalimu. Kono ka Sani, Si ka lu nanula kufitelela lipilaelo za lifasi le. Na lapela, Ndate, kuli U ka fuyola sicaba mo.

174 Mi cwale, kuli, mutu ni kaufela ya ni utwile, kakusasana cwana, abulele Niti yee, kuli Wena ube paki yaka, Mulena, sina Samuele wa kale; “Kana Ni kile na mi bulelela sika kaufela ka Libizo la Hao kwanda niti?” Ki bona baatuli. Mi Na ba bulelela cwale, Mulena, kuli U ni isize kwa Naha yani. Mi U ziba kuli yeo ki niti.

175 Mi cwale, Ndate, haiba ku na ni ba ba sa Ku zibi, ye haibe yona hola ye ba kali, “Mulena, beya mwahali kuna tato ya kuba tato ya Hao.” Lumeleza cwalo, Ndate.

176 Mi cwale, mina, ka litho za mina, mu nanule mazoho a mina, ni kubulela kuli, “Ni lapelele kwateni, Muzwale Branham; Mulimu aeze seo ku na.”

177 Cwale hamunze mu inzi fona fomuli foo, ka bunde feela, kiñi ha mu sa buleli ku Ndate, “Mulimu, mwahala pilu yaka, kacenu, Na hanyeza lika za lifasi kaufela. Na hanyeza lika kaufela, ku lata fela Wena ni ku sebeleza Wena fela, mwa bupilo bwaka kaufela. Mi Ni ka eza, kuzwa lizazi le, kuya kwapili, ni kana ni Ku latelela, mwa Liñolo kaufela la Bibeles ya Hao?” Haiba wa li kuba u kolobezwe ka kolobezo ya Bukreste, “Ni ka eza cwalo, Mulena.”

178 “Haiba Ni samba kuba ni amuhele Moya o Kenile. . .” U ka ziba ha se u U amuhezi. U ka ku fa, U ka kufa sepo ni Lilato yo tokwa. Oh, hakulata u ezize ze shutana, ukile waba ni maikuto a mubili, inge kuli u huwile kamba kubulela ka

malimi, ili lika zende. Kono haiba Lilato la Bumulimu leo haliyo mwateni, u lumele cwale, uli, “Mulena, beya mwahala pilu, ni mwa moyo waka, bufumu bwa Moya wa Hao, kuli Ni kone kulata, ni kukuteka, ni kuba ni Lilato la Bumulimu lani mwa pilu yaka, kacenu, le li ka ni isa kwa Naha yani foo kubuyela kwaka kwa mafelelezo ha se ku ni siile,” halunze lu lapela. U lapele, weka kasibili, cwale. Ka nzila ya hao fela, u lapele, ukupe Mulimu kuli aku ezeze zeo.

<sup>179</sup> Na mi lata. Na mi lata. Mina baana babande ba milili ya limbi babainzi mo, baba belekile katata hahulu ni kufepa bana! Mina baba zielehile, basali bahulu baba zwile mioko mwa meeto a mina! Ha lubone ni mu sepise cwana, kezeli, mulatiwa, ha ku cwalo kwabuse bwa bupilo boo. Ni lumela kuli Ki zeinzi hande mwa sibaka. Ki sibaka fela sesiñwi ku se lupila ku sona. Woo wa bola fela mona mo lu pila cwale.

<sup>180</sup> “Kono lata ku na, Mulena, tato ya Hao i ezwe.” Aku lapele, halunze lu lapela hamoho.

<sup>181</sup> Ka likute, Mulena, fa mayemo a Linzwi la Hao ni Moya o Kenile wa Hao, lu tabile hahulu kuli lu ziba ko ku zwelela Kupepwa kwa luna. Lu tabile kuli ne lu “si ka pepwa ka klata kwa mutu, kamba kulata kwa nama, kono ka tato ya Mulimu.”

<sup>182</sup> Mi lu lapela, kacenu, Ndate, kuli ba basweli ku kupa cwale sishemo sa kuswalelwa, kuli Moya wa Hao u eze musebezi woo, Mulena. Hakuna mukwa wa kuli ni eze cwalo; Na ni mutu feela, ni mwana mushimani fela yomuñwi wa Kishi. Kono lu tokwa Wena, wena Moya o Kenile.

<sup>183</sup> Mulimu, ni konise sina Samuele, ya bulela Niti ya Linzwi. Mi U pakile kuli Li cwalo, kufita ni cwale, mi Ni lumela kuli U ka zwelapili, haibile fela Ni pila ka niti ku Wena.

<sup>184</sup> Mi cwale kaufela ha ba amuhele Bupilo Bobusafeli, Ndate. Mi lizazi le cwale lisike la zwa kubona. Mwa nako ye ba ka siya lifasi le, se cwale, se Ni ba bulelezi, si kwaluhele ku za niti. Mi halunze luginzi mo, luli ba bashwa, kacenu, lu talimela fa waci ya luna, lu nahana sico sa luna sa mulalelo, za musebezi kamuso, za lipilaelo ni matata a bupilo, halina kuba teni Kwani. Kaufela li ka fela. Hakuna ku yo ba lipilaelo; mi ni tabo iliñwi ya Kuyakuile. Bafe mufuta wa Bupilo bwani, Ndate, mañi ni mañi. Mi cwale. . .

<sup>185</sup> Ni kupa se ku Wena, Ndate, kuli mutu kaufela yaliteni mo kakusasana cwana, ya ni utwile ha ni bulela pono ye, mi Ni yo kopana ni mutu kaufela wa bona kwa neku lani; kamba kukona kuba baana mo baba kona ku sa lumelelana ni na, ni basali, cwalo. Kono, Ndate, u si tuheleli kuli zeo li yeme mwa nzila ya luna. Mi lu yo kopana kwabuse Bwani, mi ba mate, ni bona, mi lu yo swalana mañi ni mañi, inge luhuwa, “Muzwale wa luna yomunde.” Ha kube inge mo ne li boniselizwe Kwani, Mulena, ku mañi ni mañi, kaufela ze Ni lata, ni kaufela ze ni

lata. Ni lapela ku be cwalo, Mulena. Mi Na ba lata kaufela. Ha ba iponahaze, Ndate. Ni fa ku bona Bupilo Bobusafeli cwale. Ha ba eze kalulo yabona, kuli a Bu amuhele. Kakuli Ni kupa ka Libizo la Jesu. Amen.

<sup>186</sup> Luna ni fela mizuzu yelikani, ya ku lapelela bakuli. Ni bona kuli luna ni musizana yomunyinyani, ya kula fa, ni kalibe ya inzi mwa sipula.

<sup>187</sup> Cwale, kwa mizwale yaka yeminde hahulu, likezeli, shangwe musike mwatokwa ku ni utwisisa. Ha—Ha ni zibi sene si ezahalile. Ha ni zibi sene si ezahalile. Kono, Mulimu, ha Ni ka shwa, ni konise ku kutela Kwani. Ni konise fela kuya kwa Sibaka sani, kona ko Ni tabela kuba, kamba neli kai. Ha ni liki kuba Paulusi ya na swashile mwa lihalimu la bulalu. Ha ni buleli cwalo. Ni lumela kuli Na sweli fela kulika ku ni susueza, kulika ku ni fa nto yenyinyani ya ku ni kasha kuya kwapili, mwa bulumiwa bwaka bo bunca bo butaha.

Kana ku ka bonahala ku sa swanela haiba Ni bala nto yeñwi fa, fa muzuzu fela? Kana kukaba hande? [Kopano ili, “Amen.”—Mu.]

<sup>188</sup> Iliñwi ya mitende ye hasani lifasi kaufela, Billy Graham. [Muzwale Branham ubala siemba sa mutende, sina cwalo—Mu.]

<sup>189</sup> “Dokota Billy Graham Umemiwa Kwa Islam,” fa pampili ya fa pata yaba *The Afrikaans Times*, Liowa la fifitini, 1960. Muñoli wa siemba se, nali mu Moslem, Mohammedan, u nahana kuli limakazo li lukela kulatelela ku kutazwa kwa Evangeli ya Kreste, yaswana maabani, kacenu, ni kuyakuile. “Lwa bulela luli, ‘Ki sona se. Kreste na sepisize balateleli ba Hae, ha Na bulezi kuli, “Ya lumela ku Na, misebezi ye Ni eza u ka i eza ni yena; mane misebezi yemituna kufita ye u ka ieza.” Kana Keleke i kile ya eza misebezi, kuli, li—li likezo za Kreste mwa Bible? Yakona ku Li eza kacenu? Kana kuna ni keleke yekona ku kauhanya, kueza nihaiba licika la limakazo ze ezizwe ka Kreste, kusina kubulela kuli “misebezi yemituna”? Kana wakona, ka kuba mutu unosi, ya zibahala, muyemeli wa Bukreste, kuzusa, bafu kwa buiketo bwa mubili? Kana wakona kuzamaya fa liwate? Wakona kufolisa bakuli ni ku apula meto a libofu? Kana se, kuya ka ze bulezwi fahalimu ki mafosisa, a ze tomilwe ki ba Mohammedan? Kamba kutoma. . . kamba tatubo ka Kreste. . .? . . balateleli sina litaba za babañwi, kamba ka tumelo ya mina? Zeñata ba ba Moslem ze bulezwi mwa mutende ki litaba ze lyangani ku ifi ni ifi.”

<sup>190</sup> Ha ba kuteki mu Moslem yoo, kono na bulela niti. Kono ki ze ze ba bulezi. [Muzwale Branham ubala mwa mutende, sina cwana—Mu.]

<sup>191</sup> “Kalabo yende yeswanela ya kubala Bible, ni kuziba Koran. Koran i nani. . . ka. . . i sweli kubapiswa. Ze bulelwa ki ba Mohammedan za shutana ni ku fitelelela Bukreste, ki lika zetuna

mwa b-u-i-p-i-t-e-l-i, buipiteli,” Na sepa, “munahano. Muñoli, nihakuil cwalo, u sweli fa taba yabutokwa kuama limakazo ze lukela kuba za Keleke. Kono fa hape lwa kakanya busepahali bwa muñoli, kakuli ki mañi yakona kusupa ni ku kakana ni limakazo ze ezizwe ki Rev. William Branham fapila ma Moslem mwa South Africa, ba teni sauzande ha ba amuhela Kreste kuba Mupulusi? Mwatasa bulumi wa bwa William Branham, kwa Durban, South Africa, ni libaka zeñwi mwa lifasi, kamba T. L. Osborn mwa East Africa. Eeni sha, lu yema handende ka kulumelelana ni Billy Graham. Lu bulezi kalulo ya puzo, ki ye sina . . . Puzo ye haina libaka le li i yemela.”

<sup>192</sup> Kono mwahala lika zateni kaufela (ba ni biza . . . ba li ne luli bafitelezi ba tumelo, kuli ne lu sa zibi se ne lueza) nebana ni kupaka, mwa mutende wa bona, kuli Mulimu na ezize cwalo, kupale kumane. Mulimu u sa li Mulimu, ni kacenu, sina Mwa kile a bela kamita. Hamukoni ku nahana kuli ha ba li lumeli, ha ba li boni. Ha li si ka patiwa; ha li ezahaleli mwa lilulu. Mi mianda anda ya likitikiti za sicaba ne bainzi fani, inge ba talimela. Ha ba bona mushimani wa sihole, yana tile kwani, Moya o Kenile wa mu bulelela za bupilo bwa hae, ni lika zeñwi, ni sene si ezahalile kwani. Ni kubona ma Moslem ba teni sauzande ha ba lobala mwa mubu, kulobala fafasi, ku amuhela Kreste kuba Mupulusi wa bona.

<sup>193</sup> Lu sana ni bo T. L. Osborn, ni babañwi cwalo, baba sa fela lingu Lico la lingu. Ni sepa kuli Muzwale Osborn ha si ka fumanaha kale mwahala ma Moslem. Ba bulelela kuli ba hatelela luli. Kono lu sana ni Mulimu yakona kulamulela ngu kwa tau, wakona ku lamulela ngu kwa bere.

<sup>194</sup> Si ni ezize bunde ka kuziba kuli ba lukela ku li ñola ni ku lilemuha. Batili, ba hupula kuli haba cwalo; ba ikela ni kufulalela mikokoto ku zona, mi bali, “Ah, mazazi ao felile.”

<sup>195</sup> Ma Moslem bali, “Kana ku cwalo? Bibeke kaufela kona kuli i felile. Mu fosize kaufela. Mu sweli kulapela Mutu, a Mutu ya na shwile, mi Libizo la Hae neli Jesu. Mi A shwa, myaha yeñata ya kale koo, mi hakuna nto yecwalo ya kuli Na zuhile.”

<sup>196</sup> Kono ne ba sa buleli cwalo kwa mukopano wa mwa Durban. Na yemi fani inza eza lika zeswana za Na ezize, za pakiwa ku bona. Cwale nihaiba li—li likopano lina ni kukuta, yena mutu ya swana luli yana ñozi ni ku ni bulelela kuli Ni lukela kufitulula mwa tuto ya Bibeke. Ki yena yana lukela kuñola zani mwa mutende wa bona. Mulimu u ka ba konisa ku Mu lumbeka, ni hakuli cwalo, he, kupale kumane. Yeo ki niti. Uka ba eza kuli ba Mu lumbe, kupale.

<sup>197</sup> Luna ni musizana yomunyinyani, ya kula ya inzi faa. Ki mwana hao yoo? Una ni butata mañi, kezeli? [Kezeli u li, “Ki musinga o pazuhile mwa booko.”—Mu.] Ima? [“Musinga opazuhile mwa booko.”] Musinga opazuhile mwa booko. [“Ne ni

ku ñolezi, myaha nyana yefitile, ka za musinga wa hae o pazuhile mwa booko.”] Oh, luli. [“Ubile akula cwale, ikaba myaha yemine mwa kweli ya Muyana.”] Myaha yemine, mwa kweli ya Muyana. [“Muzwale Neville ubile atahanga ku to mu lekula.”] Oh, kana ki kwa Marengo, kamba sibaka sesimu sa kwani? [“Paoli.”] Paoli. Kana yo ki yena musizana, cwale? Kuna ni fela nto iliñwi, ima, yekona kuilisa musizana: yoo, ki Mulimu ya mu ziba. [“U ikutwa mbweshahulu kufita sapili.”] Ni tabile hahulu ka seo.

<sup>198</sup> Kana ubile kwani ku yo mu lapelela, Muzwale Neville? [Muzwale Neville uli, “Eeni, sha.”—Mu.] Haibile Muzwale Neville na i lo mu lapelela, u sweli kuba hande. Lu sa na ni balisana baba ziba Lico za lingu.

<sup>199</sup> Ki butata mañi bo nani, kezeli yomunde, wena yainzi mwa sipula foo, sa hao? [Kezeli uli, “Una ni kansa.”—Mu.] Kansa.

<sup>200</sup> Kihande, haiba Ni ku buze nto yeñwi, mwendi ona fa. Ki ba kai mwahali mo ba ba folisizwe ka . . . kwa kansa, munanule mazoho a mina? Talima kwanu, kezeli. [“Sa li shushu cwale, mi hakoni ku utwa so bulela.”—Mu.]

<sup>201</sup> Mulimu ki mufolisi. Lwa ziba cwalo. Kambe Ni ku bulelezi kuli Ne ni kaya kwani ni kufeza butuku bwa misinga mwa booko ku musizana ni ku mu folisa, Ne ni ka ku bulelela za buhata; kamba kuzwisa kansa kansa. Kono Na ziba nto iliñwi, nekuna ni bere; ki kansa, sitombo, bubofu, kamba mane lifu, kuswala zeñwi za lingu za Mulimu, zazi leliñwi. Mi Ni ye ka Mata a Mulimu, mi Ne ni ka mu bulaya ni kutisa ngu yani yani. Yeo ki niti. Mi lu ya cwalo kuzwa kacenu, kusina nto yeñwi yetuna, sa *kuli-ni-kuli*. Ni ya ni lwezi kafwililo ka tapelo. U ka li kutisa.

<sup>202</sup> Wa lumela cwalo, nji cwani, kezeli? Wa lumela, ni wena, nji cwani, kezeli? Ki ba bakai ba mina ba balumela ka lipilu za mina kaufela cwale?

<sup>203</sup> Cwale amuinamise litho za mina halunze lu lapela.

<sup>204</sup> Ndate Yomunde, musizana yomunde yomunyinyani ya lobezi faa, ya si ke ku zamaya ni kamuta, ka kukona kuzamaya, kwanda kuli U mu tuse. Sila u musweli. U fitelezi fakona kufita dokota kaufela. Sila u mu nyungile kuisa fahule mwa sibaka sa mwa halimu, kufitela dokota apalelwa kueza nihaiba sika. Kono ha yo kwahule ni Wena, Mulena. U inzi fo Kona ku beya lizoho la Hao ku mu swala. Fa mayemo a Linzwi la Mulimu, Ni mu beya mazoho kalibe yoo, ni kunyaza butuku bwa misinga ya mwa booko yee. Ka Libizo la Jesu Krete, ni mu biza kukutela kuba musali ya mwa buiketo hape. Uka pila kwa kanya ya Mulimu. Mi ha be hande, azamaye akene mwahali ni kuzwela fande a keleke ye, inge babañwi ba ba keni, ka kuswana ona cwalo, lu fa tumbo ku Mulimu. Ku be cwalo, ka Jesu Krete.

<sup>205</sup> Haili ka za kutamana kwa milili ya hae, ki linako fela zelikani, mi ukaba mwa Naha ya mwabuse yani ko ne Ni si ka bona macembele, kamba banana. Kono balatiwa ba hae bateni

moo, ba lila, mi ne ba mu lata. Sila se situna se si mu sweli ni ku mu yumbela kwahule ni dokota, tau ye sabisa ya kansa. Mulimu, Na taha, na mulatelela. Ni taha ku to mu kutisa. Ni bulaya tau ya kansa, ka Libizo la Kreste ya si ka komiwa fateni, ku ye Ni li ndumeleti wa hae. Ha li mu siye, mi habe hande, mi apile myaha ye miñata, hape, kwa likute ni kanya ya Mulimu, ka Jesu Kreste Mulena luna.

<sup>206</sup> Cwale, Ndate yakwa Lihalimu, seo ha si mwa mpi yetuna, ha ki mukwale, mushobo kamba manzwi a kona kubulelwa, kono ki ka kuitusisa kafwililo ka tumelo. Ni latelela moyo wo, ni mubili wo sila sa kansa si mu pamulezi kumatizeza kwahule ni dokota. Kono Na mu latelela, kakusasana cwana, Mulena, ni mu kutiseza kwa mafulisezo a matala mwa muluti o munde ni mezi a kuzize. Ka Libizo la Jesu ya komile, ku yo Nili ndumeleti wa Hae. Ka tumelo ye sa fokoli, Ni lumela kuli u ka kutisezwa hape, ka mata aa a tapelo ye lu ezize yee. Ku be cwalo.

<sup>207</sup> [Muzwale Branham ubulea ni yomuñwi, mi kihona akutela kwa maikulofoni fa katala—Mu.]

<sup>208</sup> [Muzwale Branham ubulela ni Muzwale Neville—Ed.] Ni lumela kuli kuna ni sebelezo ya kolobezo. Kana iteni? [Muzwale Neville uli, “Eeni, sha. Bakutazi bababeli bana ni balikani baba ka kolobezwa ni bona.”—Mu.]

<sup>209</sup> Mu inule litho za mina fa muzuzu fela? Mulisana u ni bulelezi fela kuli . . .

<sup>210</sup> Sicaba se sa kula luli, luli sa kula. Ba kaba hande. Fela musike . . . Ki hande. Sepiso ya Mulimu ha i palelwi. Lu ka ba latelela.

<sup>211</sup> Bana ni sebelezo ya kolobezo. Kuna ni batu baba lukela kuya. Lu kaba ni sebelezo hape busihu boo.

<sup>212</sup> Kana kuna mutu mo ya palezwi kutaha busihu boo, ya tabela kuli lu ku lapelele cwale, ya sa koni kuba mo busihu boo? Utahe kwanu kapili he, ya sa koni kukuta busihu kacenu. Ni kaba ni nako yeñata; mufuta wa mukoloko wa tapelo cwalo, busihu boo. Bana ni ku kolobezwa batu baa.

<sup>213</sup> Una ni mushimani foo? Ku lukile. [Muzwale utaha kwapili mi u bulelela Muzwale Branham kuli, “Ku lukile haiba Ni ka kufa se?”—Mu.] Eeni, muzwale. Ni itumezi, hahulu luli. Kana ku lukile haiba Ni bala kasamulaho nyana kamba ona fa cwale? Ni itumezi, sha.

<sup>214</sup> Cwale haiba u ka lufa fela muzuzu kamba yemibeli fela, kona kuli lukaba ni—ni sebelezo ya—ya kolobezo. Ni ziba kuli u ka tabela ku i bona. Mi ni bona baba itakaleza kolobezo ye kakusasana cwana, kihande, mina, likezeli muye neku *le* ku yo cinca liapalo, mi baana muye kwa neku *le*. Mi kipeto ha Ni sweli kulapelela sicaba se si kula se, konakuli mwakona ku itukiseza sebelezo ya kolobezo. Mi bani cwale baba . . .

215 Cwale, busihu boo, Ni ka lika kumata ka—ka kulikana mwa mukoloko wa tapelo, busihu boo, kapili fela, ba sa taha fela. Mi lu ka kala mwa Buka ya 1 ya Maefese, busihu boo. Mi lu ka tabela luli cwale kuba ni mina moo, haiba hamuna keleke kwa kuya. Kono haiba muna ni mulisana wa mina ni keleke, mi mu—mu fumanehe kwa keleke ya mina yende ko mufa lituso za mina.

216 Haiba mina babana ni kuya, mi mu ka funduka ka nako ye, Mulimu ami fuyole. Mube ni luna hape haiba mu kona. Lu ka taba kuba ni mina.

217 Kana u na ni kulapelwa, ni wena, muzwale? Una ni butata mañ? Butuku bwa mali.

218 Cwale, mina babañwi, hamuze mu inamisa litho za mina, fa muzuzu, lu bata ku lapela.

219 Ndate, Na itumela ku Wena, kacenu, ka kafwililo kakalikani ka mulisana, tapelo yene wiselize tau ka mañwele, mi ngunyana ya amuhiwa ku yona, ni ku iisa ku maa yona ni ndata yona. Ni lapelela muzwale wa luna. Ni kupa kuli U mu zamaise hande akute, ni yena, Mulena. Mi ni bona butuku bwa mali ni matata a mubuli wa hae a tuhele. Na mu latelela, Mulena, na mu kutisa, ka Libizo la Jesu Kreste. Ku be cwalo. Amen.

Mulimu aku fuyole, muzwale.

Na ya, Ni bona kuli uswalelezi mushimani yomunyinyani, wa sibofu.

220 Nto iliñwi fela ye Ni tabela kubuela. Ne ni . . . kulile hahulu, ne ni tazaka. Mi Na hupula kuli . . . Ha ni lati kuli mu mbwinje se, haiba mukona. Na hupula kuli, “Mulimu, Ne ni kafa sikamañi ha ne Ni ka utwa mutu ya yemi fande? Musala ka na kali, ‘Billy, kuna ni muuna ya bata ku kubona.’

221 “Mi ne kuka kena muuna wa sitenda ni mahaha a limbi inza nyendaela fwakaa kwa sifateho sa hae. Na ka kena mwahali, ni kubulela kuli, ‘Ki wena Muzwale Branham?’

“Ne ni kali, ‘Eeni, sha, Ki na.’

222 “‘Libizo la ka kina Simoni.’ Wa ni kambeka lizoho, ni ku ni talimela fa muzuzu. Lubulele kuli, ‘U mulumeli, Muzwale Branham.’

“‘Eeni.’

223 “‘Ku kaba hande.’ Simoni Pitrosi, wa mwa Bibebe. Mo Ni ka itumela ka zeo! Na si ke abulela zeñata hahulu. Na ka beya fela lizoho la hae ku na. Ne ku kaba hande.”

224 Mi kipeto se si taha ku na, ka tuso ya Mulimu, ni ka muhau wa Mulimu, kuna ni mahsumi a likitikiti kiti a batu baba lumela lika zeswana, hane Ni ka taha ku bona. Mi Na hupula kuli, “Mulena, ni konise kufita ku mutu kaufela ye Ni kona, he. Ni konise fela—fela . . .”

225 Na hupula kuli, “Haiba Simoni, kamba fela Paulusi, babañwi ba bona, ha ba ka taha ba bulele kuli, ‘Ki wena Muzwale Branham?’

“‘Eeni.’

226 “Ba ni beye mazoho, ni ku ni talimela, ba bulelele kuli, ‘Ku lukile, Muzwale Branham,’ zwela fela fande.

227 “Ne ni ka ba hande. Ne ni kaba fela hande. Luli. Se nili. . . Mushimani, ciseho yaka ne i ka nanuha hape ona fani. Ne ni kali, ‘Ni kaba fela hande.’” Eeni, sha.

228 Mi kuna ni batu ba balumela nto yeswana yeo ni kacenu. Mi seo kona se Ni tela ku to eza kwanu, ku mi beya mazoho, ku kupa Mulimu.

229 [Muzwale Branham u zwa fa maikulofoni ya fa katala mi ulapelela bakuli—Mu.]

230 Ni bata kuya ni mushimani yomunyinyani yoo, kezeli, fa muzuzu fela. Ki yo fa mushimani yomunyinyani, wa sibofu. U bile sibofu fa nako yekuma kai? [Kezeli uli, “Kuzwelela ha pepwa.”—Mu.] Kuzwelela ha pepwa. Lumela, mushimani yomunyinyani! Oh, mushimani ya tiile yomunde, hande. [Muzwale Branham ubulela ni mutu.]

231 O Mulimu ya musa! Fokupalelwa kufita madokota, fa kupepwa kwa mushimani yoo, ya na pepilwe ali sibofu, mi hakoni kubona; yena mushimani yomunde, ya lateha yoo. Mi sila, mushimani yo a si ka ba kale ni kolo mwa bupilo, a mu kasheza kwahule ni dokota. Kacwalo, Ni taha ka ku mu latelela, kakusasana cwana, Mulena. Kafwililo ka, ka likani ka tapelo ka. Ni konise ku mu kutisa, Mulimu. Ni katanyeza sila, yena diabulosi, ka Libizo la Jesu Kreste, mi Ni nga mushimani yo ku Mulimu. Ni biza meto a hae, ku Mulimu, ni mufa sa na mu uzwelize Satani. Mi ha be ni sona. Ka Libizo la Jesu Kreste, ku kaba cwalo. Ni li bulezi.

232 Cwale, kezeli, yomunde, cwale u si ke waba ni siemba sa ku kakanya, kono mushimani yo ukaba fela hande. Ni bata kuli u mukutise kwanu kwa kekeke, ni kubonisa kwa sicaba, akone kubona. U mufe kubona kwa hae, ka Libizo la Jesu Kreste.

[Muzwale Branham ubulela ni mutu—Mu.]

233 Mulena Jesu, ka kubeya. . . Mwanana yo fa lu mu lapelezi hahulu! Kono, kakusasana cwana, Ni taha hape ka Libizo la Jesu Kreste, ni lwezi kafwililo ko Ni file ka. Mi U ni tusize hahulu ni se, Mulena, ka Mata a Hao, kunga. . . kuzwa kwa mulomo wa kansa, mwa mulomo wa lifu kasibili, u zusize bafu kasamulaho ba bulelwa kuli ba shwile, inge ba lobezi bali kuoma ni kubata. Ni taha ku latelela sila se, ka Libizo la Jesu Kreste. Kona kuli mu kutise kwa buiketo hape, Mulena. Lumeleza cwalo. Kona kuli ha li petahale, kwa kanya ya Mulimu.



234 Mi u lukela ku lapelelwa? [Kezeli uambola ni Muzwale Branham—Mu.] U mulumeli wena? [“Eeni! . . . ? . . .”] Mulena, Na mu tisa, bukaufi ni kafwililo nyana ka. Ka Libizo la Jesu Kreste, ha li zwe ku yena mi lisike za kuta hape.

235 [Kezeli u ambola ni Muzwale Branham—Mu.] Kihande, ona kafwililo nyana kani, kene kailo swala Muzwale Harley, ni ku mwana hao wa musizana ni wena.

236 Cwale, Ndate yakwa Lihalimu, Ni taha mwa mulaho wa sila, ka kuitusisa kafwililo Ko ni file ka, kakuli Ubulezi kuli, “Haiba u ka konisa sicaba ku ku lumela, mi uba ya sepahala ha ulapela,” licwe nyana lani li ka nonga fo ku lukela kushwa. Ha li ye cwale, Mulena, haninze Ni li luma kwa kupo ya hae. Ka Libizo la Jesu Kreste, ha kube cwalo. Amen.

[Kezeli uli, “Mi minwana yaka i ikutwa fela hande.”—Mu.]

237 [Kezeli u ambola ni Muzwale Branham—Mu.] Ku lukile, kezeli. Cwale luka. . . Misinga i kwahule ni fo ba fita madokota. Bakona ku kufa sika sa ku kutumanisa fela, kono si ka ku utwisa bumaswe hahulu, kasumulaho wa foo. Eehe. Cwale amutalime. Lwa li latelela cwale mwa mulaho, kakusasana cwana. Lwa ya kwande; ku mi kutisa. [Hakuna manzwi fa tepu.]

238 Mulena Jesu, . . . [Hakuna manzwi fa tepu—Mu.] . . . mancwe nyana a ketalizoho, t-u-m-e-l-o, ni kafwililo ka tapelo. Mi Ni kutisa kezela ka kuzwa fa milamu ya kuzamaela ya kuikalelwa yani . . . ? . . . mwabuse. Ni mu kutiseza kwa kozo ni muluti wo batelwa mwa mafulisezo a matala ni mezi a kuzize. Ni eza se ka Libizo la Jesu Kreste. Amen.

[Kezeli u ambola ni Muzwale Branham—Mu.]

239 Mulimu Ndate, musizana nyana yoo, lu tabile hahulu kuli ha ki kulubeha kwa mata a mubili. Kono hakuna taba kamba ki sikamañi kaufela, si sa li mwa mazoho a Hao, Mulena. Mi Ni taha ni kafwililo kakanyinyani ka tumelo, ni licwe lee. Mi Ni beya licwe le ka mata kaufela o Ni kona ku li yumba ka ona. Ka Libizo la Jesu Kreste, ha likone kunata fo ku nongilwe. Mi kezela luna ha be hande. Ni eza se ka Libizo la Jesu Kreste.

[Kezeli u ambola ni Muzwale Branham—Mu.]

240 Me wa mwanana yo, ni mwana hae yomunyinyani, mwanana yo abata ku kopana ni yena kwabuse bwani, kwa neku leliñwi la mwabuse, Naha yende yani ye kanya ye Ni bulezi za yona. Mi bana. . . Mahe haana kupila kuli. . . ahulise mwana yoo, mi mane ni yena mwanana hakoni kupila nako yetelele kusina tuso ya Hao. Kono Ni taha ni kafwililo, ni mata kaufela ni kunonga kaufela ko Ni kona kuba ni kona ku sila. Mi ka Libizo la Jesu Kreste, Ni mu fapulela sona. Ba kaba hande, kwa kanya ya Mulimu. Ka Libizo la Jesu. Amen.

[Kezeli u ambola ni Muzwale Branham—Mu.]

241 Oh, zeo ki zende. Ni tabile. Kihande, bulumiwa bwani, cwale, neli bulumiwa bobutuna luli bwa kusupeza sicaba kwande. Ne bu supeza kwa misebezi. . . ? . . .

242 Ndata luna yakwa Lihalimu, Satani u katalize me yomunyinyani yo ku muisa kwahule ni fo kufita ma dokota. Bakona fela ku kenya mulyani ka nzila yeo, Mulena, o kona fela ku mu utwisa fela bumaswe, kafa ni kafa, mane apalelwa kuziba fa inzi. Mi kipeto ha taha kwa, u totobezi luli. Kono Ni taha ni kafwililo ka tumelo, ni licwe, ni libisize ka kunonga ko ku sepahala, kuli ni supe handendende fa kalulo iliñwi. Ka Libizo la Jesu Kreste, Ni zwisa kuikalelwa kwa ku yena, kwa kanya ya Mulimu. Amen.

[Yomuñwi u ambola ni Muzwale Branham—Mu.]

243 Mulimu yomunde, Muzwale George ulobezi kafoo, wa shwa, ha ki kale hahulu. Ni boni se i ezize tumelo ku yena. Cwale una ni butuku bwa kuopa mwa lingongo, Mulena. Lu lemuhu kuli ba mufile kwateni mulyani, o kona ku kutumanisa butuku, kono hauna ku zwisa sika sani. Kacwalo lu nongisa tapelo ye, ka Libizo la Jesu Kreste. Mi cwale kuopa mwa lingongo ha kufele. Ha ye kwa hae mi abe hande.

Ni itumezi, muzwale.

244 U ikutwa cwani, mulatiwa? [Kezeli u ambola ni Muzwale Branham—Mu.] Oh, mawi! Bushushu. Kana wa u twa nihanyinyani? Uh-huh. Kwabuse fela bwa mubili wa butu! U mulumeli ku Mulena Jesu? [Kezeli uli, “Amen.”] Ni bona musali yomunde Kwani, leliñwi la mazazi aa. U kaba mwanana hape kuyakuile. Ni ziba kulil ubata kupila cwale kwa kanya ya Hae. Ku kutela kwa. . .

245 [Kezeli uli, “Batili, Ni lila bakeñisa mwanake wa mucaha.”—Mu.] Mwana hao wa mucaha. [“Sa ile cwale seli myaha yemibeli.”] Kikuli ha ukoni ku mu fumana? [“U mwa lizoho la Mulimu.”] Oh, u—u ile kale? [“Uh-huh. Mwa musindi wa lifu.”] Oh, seo. [“Mi kulila kwaka.”] Nina ni maswabi. Eehe. [“Ni ikutwa maswabi. . . Ni ikutwa maswabi. Mi Ni ikutwa inge, haiba ki tato ya Mulimu, Ni ka tabela kuli Ani inge. Hakuna ku sa tabisa ku Yena.”]

246 Kezeli, mulatiwa, Ni bata kuli u fite fo i kutwa hande. Kana u twile pono, kakusasana cwana? [Kezeli yomuñwi uli, “Wa utwa handende.”—Mu.] Kihande, u mu bulelele.

247 Kihande, u ka ku bulelela se si ezahalile. Fabuse fela bwa bupilo bwa hao faa, mushimani wa hao yani usweli ku ku libelela. Uka yoba mwanana inge yena. Lilato, lilato fela ki. . . [Kezeli uli, “Ha ni lati kuina. Ni bata kuya ku yena, haiba ki tato ya Mulimu.”—Mu.]

248 Ndate yomunde yakwa Lihalimu, takano ya bupilo i matilwe. Hakusana ze siyezi zeñata. Mi mushimani wa hae yomunde,

mwabuse fela bwa nuka, haiba na ka kona kuitemuna, na ka li,  
“Ki mazazi nyana fela.” U libelezi mukolo, Mulena, o ka mufitisa  
mwa mbundu, kuliba kwa Naha ye kanya yani. Aku mu fuyole,  
Ndate, ni ku omba omba pilu ya he. Mi yeo ibe tamahano yetuna,  
mwabuse fela bwa nuka.



*MULENA YA HANILWE* LOZ60-0515M  
(The Rejected King)

Liñusa le ka Muzwale William Marrion Branham, neli kotalizwe lwa pili mwa Sikuwa la Sunda kakusasana, Kandao 15, 1960, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2020 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)